





采芳隨筆卷七

北平查 彬伯埜輯

桐花高品也爾雅云榮桐木即此華而不實故曰榮一名華桐一名泡桐葉三枚大徑尺易生皮色麤白二月開花如牽牛花色白造琴瑟以華桐生山間者為樂器則鳴孫枝為琴則音清又一種青桐即爾雅曰櫟桐注今之梧桐也皮青如翠葉缺如花四月開微嫩黃小花即梧桐一葉落而天下知秋并遁甲書知閏之梧桐結子長三寸許人家齋閣多種之附考於後一種紫花桐葉三角而圓大色青多毳而不光滑文微赤花亦先葉開

紫色作穉南中有深紅色者木可為琴唐元微之稹對  
桐花寄樂天詩云微月照桐花月微花漠漠怨澹不勝  
情低徊拂簾幕葉新陰影細露重枝條弱夜久春恨多  
風清暗香薄是夕遠思君思君瘦如削但感事睽違非  
言官好惡奏書金鑾殿步履青龍閣我在山館中滿地  
桐花落樂天答詩云山木多菊鬱茲桐獨亭亭葉重碧  
雲片花簇紫霞英是時三月天春暖山雨晴夜色向月  
淺閨香隨風輕行者多商賈居者悉黎氓無人解賞愛  
有客獨屏營手攀花枝立足躅花影行生憐不得所死  
欲揚其聲截為天子琴刻作古人形云待我成器薦之



于穆清誠是君子心恐非草木情胡為愛其華而反傷  
其生老龜被剗腸不如無神靈雄雞自斷尾不願為犧  
牲况此好顏色花紫葉青青宜遂天地性忍加斧斤刑  
我思五丁力拔入九重城當君正殿栽花葉生光晶上  
對月中桂下覆階前蔭汎拂香爐煙隱映斧蒸屏為君  
布綠陰當暑蔭軒楹沉沉綠滿地桃李不敢爭為君發  
清韻風來如叩瓊泠泠聲滿耳鄭衛不足聽受君封植  
力不獨吐芳馨助君行春令開花應晴明受君雨露恩  
不獨含芳榮戒君無戲言翦葉封弟兄受君歲月功不  
獨資生成為君長高枝鳳凰上頭鳴一鳴君萬歲壽如

山不傾再鳴萬人泰泰階為之平如何有此用幽滯在  
巖坳歲月不爾駐孤芳坐凋零請向梧枝上為余題姓  
名待余有勢力移爾獻丹庭宋胡武平宿井桐詩云一  
水清無底雙桐碧有情銀牀翻晝影玉虎墮秋聲露葉  
游絲斷風枝宿鳥驚隔簾人不寐又送月西傾歐陽永  
叔桐花詩云猗猗井上桐花葉何衰哀下蔭百尺泉上  
聳凌雲材翠色洗朝露清陰午當階幽蟬自嘒嘒鳴鳥  
何喈喈日出花照耀飛香動浮埃今朝一雨過狼藉黏  
青苔斯桐乃誰樹意若銘我齋常聞漢道隆上下相和  
諧選吏擇孝廉視民嬰與孩政聲如九韶百物絕妖災

優優潁川守能致鳳凰來到此幾千載丹山自崔嵬聖  
君勤治理百郡列賢才嗟爾不自勉鳳凰其來哉劉原  
父敞句云城角日高春寂寂小庭行徧拾桐花楊誠齋  
桐花詩云春色來時物喜初春光歸日興闌餘更無人  
餞春行色猶有桐花管領渠老去能逢幾箇春今年春  
事不關人紅千紫百何曾夢壓尾焦桐也俗塵近時徐  
嵇菴夜枯桐引詩云枯桐向雨泣感恩不及曙貞心不  
可餐昨夜鳳凰去秋風為誰來落葉無尋處獨有爨下  
聲一獲中郎顧王漁洋桐花和李易安蝶戀花詞云涼  
夜沉沉花漏凍欹枕無眠漸聽荒雞動此際閒愁郎不

共月移窗罅春寒重憶共衾裯無半縫郎似桐花妾似  
桐花鳳往事迢迢徒入夢銀箏斷絕連珠弄

錄附赤桐花即白桐紫花者或謂之紫桐花一名岡桐一名

油桐一名荏桐一名罌子桐一名虎子桐春開淡紅花  
狀如鼓子花實大而圓每實中或二子或四子大如大  
楓子可取作桐油徐抱獨句云誰與深春共憔悴隔江  
一樹紫桐花

錄附青桐即爾雅曰櫨桐今之梧桐也皮青如翠葉缺如花

妍雅華淨賞心悅目其木與節直生理細而性緊四月  
開花嫩黃小如棗花墜下如醜五六月結子莢長三寸

許五片合成老則開裂如箕名曰橐鄂所謂梧桐一葉  
落天下盡知秋是也詩經梧桐生矣于彼朝陽莊子桐  
乳致巢枚乘云龍門之桐高百尺而無枝使琴摯斫斬  
以為琴淮南子梧桐斷角馬斃截玉又云知者有所不  
及故桐不可以為挈張協七命云寒山之桐出自太冥  
含黃鐘以吐榦據蒼岑以孤生魏明帝猛虎行云雙桐  
生枯井枝葉自相加通泉溉其根元雨潤其柯晉司馬  
彪與山巨源詩云蒼蒼椅桐樹寄生于南岳上臨青雲  
霓下臨千仞谷處身孤且危于何託余足昔也植朝陽  
傾枝俟鸞鷲今者絕世用倥偬見迫東班匠不我碩牙

曠不我錄焉得成琴瑟何由揚妙曲卞和潛幽巖誰能  
證竒璞冀望神龍來揚光以見燭宋鮑明遠昭山行見  
孤桐詩云桐生叢石裏根孤地寒陰上倚崩岸勢下帶  
洞阿深奔泉冬激射霧雨夏霖霪未霜葉已肅不風條  
自吟昏明積苦思晝夜叫哀禽棄妾望掩淚逐臣對撫  
心雖以慰單危悲涼不可任幸願見雕斲為君堂上琴  
齊謝元暉眺詩云孤桐北牖外高枝百尺餘葉生既婀娜  
葉落更扶疎無華復無實何以贈離居裁為珪與瑞  
足可命參墟梁簡文帝詩云季月雙桐并新枝雜舊株  
晚葉藏棲鳳朝花拂曙烏還看西子照銀床繫轆轤沈

休文約詩云龍門百尺時排雲少孤立分根蔭玉池欲  
待高鸞集王筠詩云伊昔擅羽儀待價龍門垂優游清  
露點徽穆惠風吹月上陰陽幹雲覆死生枝公子存高  
尚聊用影華池棲鸞既不重舞鶴復何施方同散木爨  
清響竟誰知隋魏彥深詩云未求裁作瑟何用削成珪  
願寄華庭裡枝橫待鳳棲唐李巨川嶠詩云孤秀嶧陽  
岑亭亭出衆林春光集鳳影秋月弄圭陰高映龍門迴  
雙依玉井深不因將入爨誰為作鳴琴太白句云梧桐  
落金井一葉飛銀床王少伯昌齡段宥廳孤桐詩云鳳  
凰所宿處月映孤桐寒槁葉零落盡空柯蒼翠殘虛心

誰能見直影非無端響發調尚苦清商勞一彈又詩云  
金井梧桐秋葉黃珠簾不捲夜來霜薰籠玉枕無顏色  
卧聽南宮更漏長韋蘇州應物題桐葉詩云參差翦綠  
綺蕭灑覆瓊柯憶在灋東寺偏書此葉多陳標焦桐樹  
詩云江上烹魚採野樵鸞枝摧折半曾燒未經良匠材  
雖散待得知音尾已焦若使琢磨徹白玉須來風律軫  
青瑤還能萬里傳山水三峡泉聲豈寂寥元微之詩云  
夜深閒立戟門邊却繞行廊又獨眠明月滿庭池水綠  
桐花垂在翠簾前李義山蜀桐詩云玉壘高桐拂玉繩  
上含非霧下含冰枉教紫鳳無棲處斲作秋琴彈壞陵



雍國鈞陶孤桐詩云疎桐餘一榦風雨日蕭條歲晚琴  
材老天寒桂葉凋已悲根半死復恐尾全焦幸在龍門  
下知音肯寂寥宋司馬溫公光桐軒詩云朝陽升東隅  
照此庭下桐葦葦復萋萋居然古人風疎柯青玉聳密  
葉翠羽蒙午景凝餘清夕照畱殘紅雨響囊棟外風生  
戶牖中主人政多暇步賞常從容終當致威鳳覽德鳴  
嗷嗷又將施五絃解愠歌帝宮又梧桐詩云紫極宮庭  
濶扶疎四五栽初聞一葉落知是九秋來實滿風前地  
根添雨後苔羣仙儻來會靈鳳必徘徊王半山安石孤  
桐詩云天質自森森孤高幾百尋凌霄不屈已得地本

虛心歲老根彌壯陽驕葉更陰明時思解慍願斲五絃  
琴劉原父詩云一株青玉立千葉綠雲委亭亭五丈餘  
高意猶未已山僧年九十清淨老不死自云手種時一  
顆青桐子陳息齋翥西山桐詩桐栽云吾有西山桐植  
之未盈握所得從野人移來出喬嶽節凝葉尚祕根凍  
土自剝匪為待籬鷄庸將棲鸞鷲異日成茂林論材誰  
見擢巨則為棟梁微亦任楹桷仍堪雅琴器奏之反淳  
朴大匠如顧憐委軀願雕斲桐根云我有西山桐早鄰  
桃與李得地自行根受芘踰高壘上濯春雲膏下滋醴  
泉灑盤結伴循環岐分類肢體乘虛肢體大憤漲土脈

起扶踈向山壤蔓衍出林址願偕久深固無為伴生死  
死議大厦材合抱由滋此桐花云我有西山桐桐成茂  
其花香心自蝶戀縹縹帶無遮華白含香色璨如凝瑤  
華紫者吐芳英爛若舒朝霞素柰未足擬紅杏寧相加  
世但貴丹藥天豔姿驕奢歌管遶庭檻玩賞成今詩倘  
或求美材為爾長吁嗟桐葉云我有西山桐下臨百尺  
溪布葉雖遲遲庇本亦萋萋密類張翠幄青堪翦封圭  
滑澤經日久濡毳隨榦躋迎風帶影動墜雨向身低寧  
隱凡鳥巢自蔽儀鳳棲松栢徒爾頑蒲柳空思齊但有  
知心時應候常弗迷桐乳云吾有西山桐厥實狀如乳

舍房隱綠葉致巢來翠羽外滑自為穗中犀不可數輕  
漸曝秋暘重即濡綿雨霜後感氣裂隨風倒煙塢雖非  
松栢子受命亦於土誰能好琴瑟種之向春圃始知非  
凡材諸核豈余伍桐孫云高梧已繁盛蕭蕭西山隴毳  
葉竟開展孫枝自森聳擅美惟東南滋榮藉萋葦不能  
容燕雀只許棲鸞鳳寧入吳人爨堪隨伯禹貢雨露時  
加潤霜雪胡為凍况有奇特材足任雅琴用中含太古  
音可奏清風頌桐風云分材植梧桐桐茂成翠林日日  
來輕風時時自登臨拂榦動微毳吹葉破圓陰虛涼可  
解愠鼓拂如調琴莫傳獨鵠號願送棲鳳吟豈羞楚襄

王蘭臺堪披襟亦陋陶隱居高閣聽松音無為搖落意  
慰我休闕心桐陰云枝軟自相交葉榮更分茂所得成  
清陰仍宜當白晝陰疑翠巒展翳若繁雲覆日午密影  
疊風搖碎花漏冷不蔽空井高堪在庭甃吾本闕野人  
受樂忘焚疚亭亭如張蓋翼翼如層楫月夕獨徘徊猶  
思一重覆桐徑云時人羨桃李下自成蹊徑而我愛梧  
桐亦以成乎性中平端隧道還往非遼夔直入無欹斜  
橫庭亦徑廷月夕照影碎春暮花光映清朝濛露溼落  
日隨煙暝不使草蔓滋任從根裂迸堪詣蔣詡徒惟任  
蓬蒿盛朱子詩云永日長梧下清陰小院幽自憐風嫻

嫺客賦雨瀏瀏作別今千里相思欲九秋更憐同社友  
復此誤淹畱林霽山景熙桐角詩云田家無律呂聲寄  
始華桐碧卷春風老清吹野水空客心寒食後牛背夕  
陽中不惹梅花恨年年送落紅金張子發建詩云葦葦  
嶧山桐一樹十二枝枝分十二律所指各不移胡為師  
襄子獨謂東南竒一律不可闕一枝不可遺誰能以此  
意說似典樂夔元黃清老天驥桐雨云曾將秋信報人  
知又與西風泣別離病綠滴殘猶有淚題紅流去更無  
詩舊巢鳳冷朝飛遠古井金寒曉汲遲待得楚臺雲散  
後却憑琴調寄相思鄭氏允端詩云梧桐葉上秋先到

索索蕭蕭向樹鳴為報西風莫吹却夜深留取聽秋聲  
明高季迪啓詩云晴粉朝英墜涼瓊夏葉舒鳥啼高樹  
早蟾轉薄䟽虛朱絃未薦曲彤管屢題書坐恐銷華澤  
商吹起前除又詩云井邊雙玉樹高結自生涼影散秋  
雲薄聲喧夜雨長疎英飄碧簟亂葉響銀床綠綺誰能  
斷持將奏鳳凰鍾子惺惺月下新桐詩云是物多妨月  
桐陰殊不然長如晨露引不隔晚涼天綠滿清虛內光  
生幽獨邊懷新君亦爾到在夕陽先施幼警槃詩云雲  
捲清秋畫角悲梧桐滿地月明時斜穿翠葉通金井直  
透蒼波漾玉池青女莫驚烏鵲夢素娥偏惜鳳凰枝故

人千里關情處獨立空階影漸移徐茂吳桂咏桐綿詩  
云濡毳桐枝別作葩溫柔香裏玉無瑕冰蠶未假鮮新  
絕雪璽還同麗密誇猶勝南中榮吉貝漫教西蜀侈種  
華銀牀金井俱搖落誰信迴暄更有涯近時張元明光  
啓老梧詩云百尺上參天何從計種年嫩痕坼似壘古  
蘇大于錢過雨看行蟻因風聽噪蟬移床新浴罷倚枕  
把殘編王漁洋題百尺梧桐圖詩云別館多梧桐偶此  
成幽寂獨向高閣眠夜聞踈雨滴百尺高樓上何人相  
往還夕陽海門樹秋雨江南山又云河漢澹中夜碧梧  
陰漸踈幽人坐高閣秋色滿巖居風竹同蕭瑟蒼苔捲



掃除數峰江上好朝夕映琴書陳其年新桐詩云涼颼  
生北牖纖月墜西林乘興且長嘯無人知我心因之高  
齋後坐彼脩梧陰此境已幽邈無勞張素琴張蕭亭詩  
云梧桐葉始生秋聲已在樹淒涼既如此種之非無故  
夜半挂新月凌晨流清露豈無桃李花嬌豔非所慕趙  
橙園執贄詩云窮愁暮暮復朝朝幸有圖書慰寂寥一  
枕北窻回午夢桐花滿地雨蕭蕭王海重兆潤桐雨齋  
詩云碧梧蔭階除踈雨滴空翠亭亭秋色中往往起涼  
吹我愛荆蠻民聊此成清悶杭大宗詩云幽居愛依山  
美蔭不離目意行聯朋歡迢遞出深麓理檝遵河梁欸

乃憂寒玉入門青桐高寫作一檐綠上枝巢鳳凰下以  
覆叢菊大葉時吟風客至奏清筑嗟爾凌霄姿跼縮在  
巷曲王東田種桐詩云碧蘚開鋤破青桐喜種成踈簾  
邀月影高枕借秋聲閨葉分明數孫枝次第生不須嘲  
拱把終有鳳凰鳴金醉墨桐乳詩云陰濃青悶洗來初  
珠蓓垂垂映綺踈葩拂禁郎生子日花殘綵鳳哺雛餘  
遮藏圭葉鴻頭似長卷孫枝竹實如一枕北窗黃妳熟  
笑他鍾乳漫多儲

附錄

刺桐花一名鸚哥花出九真三月開花赤色照映三五

房凋則三五房復發布葉繁密如梧葉花附幹而生側

敷如掌形若金鳳枝幹有刺其實如楓花經刺桐八品  
二命唐陳嵩伯陶泉州刺桐花詩云海曲春深滿郡霞  
越人多種刺桐花可憐虎竹西樓色錦帳三千阿母家  
石氏金園無此豔南都舊賦乏靈材只因赤帝宮中樹  
丹鳳新銜出世來猗猗小豔夾通衢晴日薰風笑越姝  
只有紅芳移不得刺桐屏障滿中都不勝攀折悵年華  
紅樹南看見海涯故國春風歸去盡何人堪寄一枝花  
赤帝嘗聞海上遊三千幢蓋擁炎州今來樹似離宮色  
紅翠斜欹十二樓髣髴三株植世間風光滿地赤城閒  
無因秉燭看奇樹長伴劉公醉玉山宋王梅溪十朋詩

云初見枝頭方綠濃忽驚火傘欲燒空花先花後年年  
雨莫遣時人不愛紅彭伯玉綱詩云樹頭樹底花楚楚  
風吹綠葉翠翩翩露中幾枝紅鸚鵡詩本四句命吏寫  
刻遺其一白復誦之自覺意足乃不更改

附錄

潁桐花一名真桐俗呼貞桐花出嶺南葉如桐花連枝  
萼皆深紅色自初夏生至秋蓋草也花大如落蘇枝端  
抽赤黃條條復旁對分三層一莖上有五六十朶高三  
四尺宋蘓子美舜欽句云喚起十年閩嶺夢潁桐花畔  
見紅蕉方巨山岳詩云厥草惟天簇絳繒新紅初滴尚  
炎蒸西風坐閱芙蓉老合是花中耐久朋似子圓紅不

似花綠叢孽出野人家亦知吟骨今當換火候初成獨  
體砂明沈氏天孫詩云朱萼疑看九月楓繁枝又借嶧  
陽桐丹鬚吐舌迎風豔絳蠟籠紗照月空西域應分安  
石紫寢宮可作麥英紅綠珠宴罷歸金谷七尺珊瑚映  
水中近時李萑畹文蒸詩云三月惠州路賴桐花正然  
孤生僧舍外四照女牆邊客眼驚榴火天心續木棉朝  
雲墳草綠春去又今年包啓堂承祚詩云午日空庭蔭  
綠雲滿地鋪誰將鐵如意擊碎紅珊瑚

錄附

海桐花生南海及近海州郡葉大如掌作三花尖長青  
不凋皮若梓白而堅韌可作繩入水不爛花細白如丁

香而臭味不甚美遠觀可也又有海梧與中國松同但  
結實大形如小栗三角肥甘有香味出林邑

錄附折桐花春開花如玉簪而微紅見洞天清錄

錄附胡桐出鄴善國似桑而多曲蟲食其葉而沫出流下者

俗名胡桐淚可以汗金銀

桑花苦品也箕星之精東方自然神木之名其字象形其  
葉蠶所食也有荆桑魯桑楸桑檠桑白葉桑雞桑子桑  
山桑猗桑之別桑生黃衣謂之金桑山海經宣山有桑  
大五十尺赤理青華名帝女之桑花一名桑蘚一名桑  
錢生桑樹上白蘚如地錢花樣不是桑椹花也桑子曰  
椹與葇通又作黠有烏白二種一半有椹半無椹為柅  
桑椹甘香可為糧為酒有一寸椹者烏食物子糞落樹  
上感氣而生謂之桑寄生葉如橘而厚輒莖如槐而肥  
脆諸樹雖有桑上者佳漢樂府陌上桑云日出東南隅  
照我秦氏樓秦氏有好女自名為羅敷羅敷善採桑採

桑城南隅青絲為籠系桂枝為籠鉤頭上倭墮髻耳中  
明月珠緗綺為下裙紫綺為上襦行者見羅敷下擔拊  
髻鬢少年見羅敷脫帽著幘頭耕者忘其犁鋤者忘其  
鋤來歸相怨怒但坐觀羅敷使君從南來五馬立踟躕  
使君遣吏往問是誰家姝秦氏有好女自名為羅敷羅  
敷年幾何二十尚不足十五頗有餘使君謝羅敷寧可  
共載不羅敷前致辭使君一何愚使君自有婦羅敷自  
有夫東方千餘騎夫婿居上頭何用識夫婿白馬從驪  
駒青絲繫馬尾黃金絡馬頭腰中鹿盧劍可直千萬餘  
十五府小史二十朝大夫三十侍中郎四十專城居為



人潔白皙鬢鬚頗有鬚盈盈公府步冉冉府中趨坐中  
數千人皆言夫婚殊晉樂府採桑度云蠶生春二月春  
桑正含綠女兒採春桑歌吹當春曲繫條採春桑採葉  
何紛紛採桑不裝鉤牽壞紫羅裙採桑盛陽月綠葉何  
翩翩攀條上樹表牽壞紫羅襪陶淵明擬古云種桑長  
江邊三年望當採枝條始欲茂忽值山河改柯葉自摧  
折根枝浮滄海春蠶既無食寒衣欲誰待本不植高原  
今日復何悔梁吳均采桑詩云賤妾思不堪採桑渭城  
南帶減連枝繡髮亂鳳簾花舞依長薄蛾飛愛綠潭  
無由報君信流涕向春蠶沈君攸採桑詩云南陌落花

移蠶妾畏桑萎逐便牽低葉爭多避小枝摘駛籠行滿  
攀高腕易疲看金怯舉意求心自可知陳賀徹採桑詩  
云蠶妾出房櫳結伴類花叢度水春衫綠映日晚粧紅  
釧聲時動樹衣香自入風鈎長嫩枝曲葉盡細條空竟  
採湏盈手爭歸欲滿籠自憐公府步誰與少年同唐李  
青蓮陌上桑云美女渭橋東春還事蠶作五馬如飛龍  
青絲結金絡不知誰家子調箏來相謔妾本秦羅敷玉  
顏豔名都綠條映素手採桑向城隅使君且不顧况復  
論秋胡寒蠶愛碧草鳴鳳棲青梧託心自有處但怪旁  
人愚徒令白日暮高駕空踟躕又子夜吳歌云秦地羅

敷女採桑綠水邊素手綠條上紅糝白日鮮蠶飢妾欲  
去五馬莫留連李伯起彥遠採桑詩云採桑畏日高不  
待春眠足攀條有餘愁邨矜貌如玉千金豈不贈五馬  
空躑躅何以變貞性幽篁雪中綠王仲初建採桑詩云  
鳥鳴桑葉間綠條復柔柔攀者去手近散作長長鈎黃  
花蓋野田白馬少年遊所念豈迴顧良人在高樓又當  
窓織云歎息復歎息園中有棗行人食貧家女為富家  
織翁母隔牆不得力水寒手澁絲脆斷續來續去心腸  
爛草蟲促促機下啼兩日催成一匹半翰官上頭有零  
落姑未得衣身不著當窗卻羨青樓倡十指不動衣盈

箱又簇蠶辭云蠶欲老箔頭作繭絲皓皓場寬地高風  
日多不向中庭睨蒿草神蠶急作莫悠揚年來為爾祭  
神桑但得青天不下雨上無蒼蠅下無鼠新婦拜簇願  
繭稠女灑桃漿男打鼓三日開箔雪團團先將新繭送  
縣官已聞鄉里催織作去與誰人身上著鄭若愚谷採  
桑詩云向曉攜籠去桑村路隔淮何如鬪百草賭取鳳  
凰釵來萬里鵬蠶婦詩云曉夕採桑多苦辛好花時節  
不閑身若教解愛繁華事凍殺黃金屋裏人汪遵採桑  
婦云為報躊躇陌上郎蠶飢日晚妾心忙本來若愛黃  
金好不肖携籠更採桑宋楊明德修蠶室詩云摘繭抽

絲女在機茅檐葦箔舊堂扉年年采柘如雲綠翻織誰  
家錦地衣樓國器璫織圖二十四首浴蠶云農桑將有  
事時節過禁烟輕風歸燕日小雨浴蠶天春衫卷縞袂  
盆池弄清泉深宮想齋戒躬桑率民先下蠶云穀雨無  
幾日谿山暖風高華蠶初破殼落紙細于毛柔桑摘蟬  
翼簸簸才容刀茅檐紙窻明未覺眼力勞餵蠶云蠶兒  
初飯時桑葉如錢許扳條摘鵝黃藉紙觀蟻聚屋頭草  
木長牖下兒女語日長人頗閒針線隨緝補一眠云蠶  
眠白日靜鳥語青春長抱脛聊假寐孰能事梳粧水邊  
多麗人羅衣踏春陽春陽無限思豈知問農桑二眠云

吳蠶一再眠竹屋下簾幕拍手弄嬰兒一笑姑不惡風  
來麥秀寒雨過桑沃若日高蠶未起谷鳥鳴百箔三眠  
云屋裏蠶三眠門前春過半桑麻綠陰合風雨長檠暗  
葉底蟲絲繁卧作字畫短偷閑一枕肱夢與楊花亂分  
箔云三眠三起餘飽葉蠶局促衆多旋分箔蚤晚碓滿  
屋郊原過新雨桑柘添濃綠竹間快活吟慚媿麥飽熟  
採桑云吳兒歌採桑桑下青春深隣里講歡好遜畔無  
欺侵筠籃各自携筠梯高倍尋黃鸝飽紫葢啞吃鳴綠  
陰大起云盈箱大起時食桑聲似雨春風老不知蠶婦  
忙如許呼兒刈青麥朝飯已過午妖歌得綾羅不易青

羣女捉績云麥黃雨初過蠶老人愈忙辛勤減眠食顛  
倒著衣裳絲腸映綠葉練練金色光松明照夜屋杜宇  
啼東岡上簇云采采綠葉空翦剪白茅短撒簇輕放手  
蠶老絲腸媿山市浮晴嵐風日作妍煥會看繭如甕纍  
纍光眩眼炙箔云我峨巖薪炭重重下簾幕初出蟲結  
網遽若雪滿箔老翁不勝勤候火珠汗落得閒兒女子  
困卧呼不覺下簇云晴明開雪屋門巷排銀山一年蠶  
事辦下簇春向闌鄰里兩相賀翁媪一笑歡后妃應獻  
繭喜色開天顏擇繭云大繭至八蠶小繭止獨蛹繭衣  
繞指柔收拾擬何用冬來作縹紈與兒禦寒凍衣帛非

不能債多租稅重窖繭云盤中水晶鹽井上梧桐葉陶  
器固封泥窖繭過旬決門前春水生布穀催畚鍤明朝  
蹋繅車車綸纏白氎繅絲云連村煮繭香解事誰家娘  
盈盈意媚竈拍拍手探湯上盆顏色好轉軸頭緒長晚  
來得少休女伴語隔牆蠶蛾云蛾初脫纏縛如蝶栩栩  
然得偶粉翅光散子金粟圓歲月判悠悠種嗣期綿綿  
送蛾臨遠水蚤歸屬明年祝謝云春前作蠶市盛事傳  
西蜀此邦享先蠶再拜絲滿目馬革裹玉肌能神不為  
辱雖云事渺茫解與民為福絡絲云兒夫督機絲輸官  
趁時節向來催租瘢正為坐踰越朝來掉篋勤寧復辭



腕脫辛勤夜未眠  
敗屋燈明滅經云  
素絲頭緒多羨君  
好安排青鞵不動塵  
緩步交去來  
眇眇意欲亂  
眷眷首重回  
王言正如絲亦付經  
綸才緯云浸緯供織作寒女  
兩髻了繾綣一縷絲成就百種花  
弄水春筓寒卷輪蟾影斜  
人間小阿香晴空轉雷車  
織云青鐙映幃幙絡緯鳴井闌  
軋軋揮素手風露淒已寒  
辛勤度幾梭始復成一端  
寄言羅綺伴當念蔀苧單  
攀花云時態尚新巧女工  
慕精勤心手暗相應  
照眼花紛紛殷勤挑錦字  
曲折讀回文更將無限思  
織作鴈背雲翦帛云低眉  
事機杼細意把刀尺盈盈  
彼美人翦翦其束帛  
輸官給邊用辛

苦何足惜大勝漢繚綾粉浣不再著陸放翁示客詩云  
桑柘成陰百草香縑車聲裏午風涼客來莫說人間事  
且共山林夏日長又桑椹詩云日高未辦續晨炊一椀  
村醪且療肌盤箸索然君勿笑桑間紫葢正累累范石  
湖科桑詩云斧斤留得萬枯株獨速槎牙立暝途飽盡  
春蠶收罷繭更殫餘力付樵蘓楊誠齋桑疇云夾岸瀕  
河種穉桑春風吹出萬條長船行老眼渾多望喚作西  
湖插拒霜方巨山岳農謠云雨過一村桑柘烟林梢日  
暮鳥聲妍青蓆老媵遙相語今歲春寒蠶未眠金劉周  
臣瞻春郊詩云桑芽粒粒破春青小葉迎風未展成寒

食歸寧紅袖女外家紙上看蠶生元趙松雪孟頫題織  
圖詩十二首正月云正月新獻歲最先理農器女工竝  
時興蠶室臨期治初陽力未勝早春尚寒氣窗戶當與  
密勿使風雨至田疇耕耨動敢不修耒耜經冬牛力弱  
相戒勤飯飼萬事非預備倉卒恐不易田家亦良苦舍  
此復何計二月云仲春凍初解陽氣方滿盈旭日照原  
野萬物皆欣榮是時可種桑插地易抽萌列樹徧阡陌  
東西各縱橫豈惟籬落間採葉憚遠行大哉皇元化四  
海無交兵種桑日已廣彌望綠雲平匪惟錦綺謀祇以  
厚民生三月云三月蠶始生纖細如牛毛婉孌閨中女

素手握金刀切葉以飼之擁紙散周遭庭樹鳴黃鳥發  
聲和且嬌蠶飢當採桑何暇事遊遨田時人力少丈夫  
方種苗相將挽長條盈筐不終朝數口望無寒敢辭終  
歲勞四月云四月夏氣清蠶大已屬眠高首何昂昂蛾  
眉復娟娟不憂桑葉少徧野如綠煙相呼攜筐去迢遞  
立遠阡梯空伐條枚葉上露未乾蠶飢當早歸秉心靜  
以專飭躬修婦事儷勉當盛年救忙多女伴笑語方喧  
然五月云五月夏以半谷鶯先弄晨老蠶成雪繭吐絲  
亂紛紛伐葦作簿曲束縛齊榛榛黃者黃如金白者白  
如銀爛然滿筐管愛此頽色新欣欣舉家喜稍慰經時

勤有客過相問笑聲聞四鄰論功何所歸再拜謝蠶神  
六月云釜下燒桑柴取繭投釜中織織女兒手抽絲疾  
如風田家五六月綠樹陰相蒙但聞繰車響遠接村西  
東旬日可經絹弗憂杼柚空婦人能蠶桑家道當不窮  
更望時雨足二麥亦稍豐酤酒田家飲醉倒嫗與翁七  
月云七月暑尚熾長日弄機杼頭蓬不暇梳揮手汗如  
雨嚶嚶時鳥鳴灼灼紅榴吐何心娛耳目往來忘僂僂  
織為機中素老幼要紉補青燈照夜梭蟋蟀窗外語辛  
勤亦何有身體衣幾縷嫁為田家婦終歲服勞苦八月  
云池水何洋洋漚麻水中央數日庶可取引過兩手長

織絹能幾時織布已復忙依依小兒女歲晚歎無裳布  
襦不掩脛念之熱中腸朝緝滿一籃莫緝滿一筐行看  
機中布計日漸可量我衣苟已成不憂天早霜九月云  
季秋霜露降凜凜寒氣生是月當授衣有布織未成天  
寒催刀尺機杼可無營教女學紡纆舉足疾且輕舍南  
與舍北嘒嘒聞車聲通都富豪家華屋貯娉婷被服雜  
羅綺五色相間明聽說貧家女惻然當動情十月云豐  
年禾黍登農心稍逸樂小兒漸長大終歲荷鋤鑿目不  
識一字每念心作惡東鄰方迎師收拾令上學後月日  
南至相賀因贍俗為女裁新衣修短巧量度龜手事塞

向庶禦北風虐人生真可歎至老長力作十一月云冬  
至陽來復草木漸滋萌君子重其然吾道自此亨父母  
坐堂上子孫列前榮再拜稱上壽所願百福并人生屬  
明時四海方太平民無札瘥者厚澤敷羣情衣食苟給  
足禮義自此生願言興學校庶幾教可成十二月云忽  
忽歲將盡人事可稍休寒風吹桑林日夕聲颼颼牆南  
地不凍墾掘為坑溝斫桑埋其中明年芽早抽是月浴  
蠶種自古相傳流蠶出易脫殼絲纈亦倍收及時不努  
力知有來歲否手凍不足惜冀免號寒憂明楊孟載基  
陌上桑云青青陌上桑葉葉帶春雨已有催絲人咄咄

桑下語于忠肅公謙咏桑詩云一年兩度伐枝柯萬木  
叢中苦最多為國為民皆是汝却教桃李聽笙歌李賓  
之東陽采桑玉堂陰二首答篁墩學士詩云采桑玉堂  
陰分蠶長安郭一勞累百枚再分連數箔寧知富賢地  
此物能沃若平生畎畝憂黽勉懷力作嗟彼衣錦兒空  
言養蠶樂吳機詠濯濯周葉歌莫莫遺我通家人同心  
故相託愛之敢輕棄弱女方就學采桑玉堂陰陰濃樹  
婆娑一采不滿筐竟日能幾何乃知富貴地不及窮山  
阿蠶成忽滿眼所得良亦多人言繫家運或者陰陽和  
向非夙夜勤豈恃葉與柯衣多必思寒吾民本同科欲



將分蠶意廣被無偏頗陳眉公繼儒詩云女桑新綠映  
宮槐三月春風戴勝來織就鴛鴦錦千疋金刀先取合  
歡裁解人頤有蠶食桑葉成字詩云綠雲稠疊滿懿筐  
繡口紛紛爭啖忙近聽餘聲追筆陣細看剩迹紹書香  
絲綸未吐先施巧籀篆無心每見長鳥跡科文人競賞  
幾曾問字向蠶房沈天孫貞儀采桑曲云青溪女兒愛  
羅裙提筐陌上蹋春雲蠶飢日暮思歸去不敢回頭看  
使君近時施尚白潤章采桑篇云種桑東谷口谿路何  
逶迤夕摘日薄暮朝摘露未晞不自知妾苦但為愁蠶  
飢努力事織作奉為君子衣七襄爛五色是妾手中絲

裁縫稱長短被服生光輝振襟還歎息含情當語誰  
新夜時復故盛頽日已衰十月隕繁霜桑葉隨風飛  
願君為磐石素心無轉移又祀蠶孃云華燈白粥陳  
楸漿田家女兒祀蠶孃願刺繡帟與娘着使我紅  
蠶堆滿箔他家織縑裁羅襦妾家賣絲充官租餘作  
郎衣及兒襖家貧租重還有無蠶時桑遠行多露好  
傍門前種桑樹謝方山重輝詩云我昔聞諸葛園林  
遍種桑吾宅纔五畝牆下亦成行不愛榭子垂愛  
此遠枝揚濃陰日夕佳常在吾廬旁五嶽老難遊  
對此可徜徉鷓鴣忽高飛三嗅入斜陽張彛嘆自  
超詩云老桑古恠大成圍秋風落葉

著地飛腹空皮裂幹拳曲霜雪歷盡生意微左邊柔條  
猶是好解向東方美晴暉我生骨瘦常苦寒繭絲賴汝  
成冬衣願汝百年不戕賊春日三眠蠶可食半榮半枯  
生亦得錢香樹陳羣題織圖詩二十四首浴蠶云近川  
傳奉種禁火方新烟直晨惟紀候浴子能知天昔曾捨  
鹽水茲復沃溫泉公桑重始事薦鞠禮所先下蠶云連  
看綠色放種辨烏兒高罨覆有遺法百草屑如毛買紙  
補牕隙女手催剪刀譬諸脫裯嬰寧免保抱勞餵蠶云  
采蘩小于錢攝桑復如許養蠶不厭多一頭百漚聚外  
魔辟香楓中閨聞吉語辛苦乞姑嫜紉針停請補一眠

云春蠶始眠時一日一夜長迴計九日中蓬首豈暇粧  
及此得休沐遲遲愛青陽明當侵曉露微徑求柔桑二  
眠云初眠至二眠七日處帷幕過替解諸斑得氣除衆  
惡咻咻復班班小大未差若暖房抱兒嬉從容理圍箔  
三眠云七日又七日三眠蠶事半繞屋桑柘多傍舍牆  
陰暗夜起照蠶盤不愁燒燭短趁間一理梳自笄鬢絲  
亂分箔云蠶當三俯後偪處飽愈促蠶薄寬于筐璘藉  
高連屋編竹為籠深構桑整葉綠晝長飼宜勤蠶大麥  
亦熟採桑云採桑俗論過連袂村舍深貴賤隨時判然  
諾莫相侵桑梯隣翁假桑甚穉子尋耳邊聞好語戴勝

飛清陰大起云大起復大起麥候恐多雨作天此時難  
溫和竟爾許陌頭採桑歸村日正亭午替上見楊花開  
顏笈寒女捉績云門樞靜不譁室中十指忙分飼別勤  
惰何心整衣裳瑩若肌無瑕充然腹有先行將事炙箔  
取薪自高岡上簇云作簇先簇心團撮判長短分隊各  
躋攀急上莫選輒迺巖薄漸空高戶爐添暖計日雪繭  
成銀山爛盈眼炙箔云吐絲趁良辰圍爐更遮幕單衣  
不知寒餘溫上蠶箔紹繚祝密緻結撰期磊落聲聲紮  
山鳴有鳥來驚覺下簇云神蟲一何憊上山還下山女  
工自此始蠶事已就闌親串過慰勞近局相欣歡可憐

戲遊伴羅綺矜朱顏擇繭云手探盤中繭目想繭中蛹  
三熟隨所珍五彩皆有用願禦天下寒遑計一身凍翁  
嫗抱區區庶免罪悔重窖繭云化蛾繭無用剪花同楮  
葉欲抽繭絲長湏令土氣泱穿空成雪窖挈伴舉雲錘  
經旬重拂拭手中淨花氎繰絲云村村棹車聲奔走茅  
厨娘餵頭覓已得執熟便縮湯坐對庭中卉白薺一丈  
長從朝繰至晚暝色莫侵牆蠶蛾云蛹毋蛾為父三化  
期適然乍如蟬蛻委忽展蝶翅圓一身脫羈縛中情尚  
纏綿好與主人約紙種留隔年祝謝云蠶師出濟河蠶  
神遡巴蜀婦孺述前聞馬頭如在目永垂衣被功庶雪

革裹辱一家敢自私八表盡蒙福絡絲云鳴徹絡絲娘  
寒催乞巧節顧杼幸不孤考縷戒勿越倚壁挑燈斜軸  
轉支機脫纜交一簣終雙星半明滅經云及時敬經絡  
度架一字排要使曲者直何憚往復來分界審既正比  
德守不回門前路如矢想見統紀才緯云連朝勤析縷  
挽髮常不了手經次及緯後素繼以華彼皆取綱直此  
獨資橫斜轉圜物惟備又有小絲車織云看織諸女伴  
清夜來倚闌蚤偷龍梭巧那避蟾魄寒借問流黃素一  
日能幾端生當服管蒯不輕易中單攀華云攀華勝染  
采婦工巧且勤絲人自軋軋幌氏徒紘紘錦心出新樣

織手成大文莫嗤貧家女能擡八伯雲剪帛云兩股試  
并剪一幅驗周尺篚貢充執纁賫獻儲賁帛黼衣知艱  
難敝衣當愛惜為語食粟者安分事穿著金際和永昌  
夜織聲詩云儘將頭緒理紛紜機上咿啞徹夜聞要審  
縱橫千杼合須知經緯一心分憑他織縷提花樣守我  
家風斤錦紋入市明朝須趁早寒燈挑盡劇辛勤張蓉  
湖九罈蠶家詩云辛勤值蠶月歷落餘桑林遙聽吳孃  
伴彷彿縑絲音百蠶絲一束織向誰家襟盈盈大堤女  
羅帶吹清陰光彩照湖色感此傷人心試看絲斷處枯  
蠶何處尋陳衛叔鴻寶雜錢云十畝濃陰外桑花簇路



隅通神還讓木射利欲先弧多豈五銖敵愛寧三宿逾  
金夫徒意氣一笑魯秋胡阮雲臺元秋桑詩云扁舟衣  
袖乍驚寒下若桑林綠意殘初響天風知半落未逢夜  
雪已先乾樓前有日蒼涼出陌上無箏錯雜彈若使秋  
胡方駐馬黃金一色樹頭看底須三宿戀他鄉誰向前  
邛喚索郎釀秫時光宜薄醉調絃情緒動清商但教天  
下輕絲暖何惜枝頭墜葉涼畱與吳儂作佳話使君秋  
興比春長閨秀頽恤緯養蠶詩云火箱蘆席閉蠶房五  
月家家拜簇忙不問繅車問繭市他人正作嫁衣裳宋  
賀延之鑄錦纏道詞云雨過園林觸處落紅凝綠正桑

葉齊如沃嬌羞只恐人偷看背立牆陰慢展纖纖玉聽  
啼鳩幾聲耳邊相促念蠶飢四眠初熟勸路傍立馬莫  
踟躕是那裏唱道秋胡曲明王鳳洲世貞浣溪沙詞云  
一夜春波釀作藍曉柔柔葉綠鬢鬢了鬢十五太嬌憨  
織作雙魚成比目偷將百草鬪宜男更無心緒餵春蠶  
近時吳梅村偉業繭虎詩云南山五日鏡奩開綵索春  
蔥縛軼材竒物巧從蠶館製內家親見豹房來越巫辟  
惡鏤金勝漢將擒生畫玉臺最是繭絲添虎翼難將續  
命訴牛哀張亦巢子頽繭虎詩云故事良辰詎可違巧  
裝新樣出閨闈剪將筐上飛蛾蛻製就釵頭猛虎威縷

縷絲皆同豹飾斑斑文遍綴蠶衣形摹毒勢真成肖縛  
艾徒傳掛戶扉尤悔庵伺繭虎西江月詞云五道蠶叢  
初闢三盆虎圈俄脩采桑春女自風流翻學下車馮婦  
浴罷恰如得子縑成便可封侯綵絲束縛掛釵頭傍向  
盤龍欲鬪毛序始宗崗繭鶴西江月詞云纔見春蠶欲  
死忽看素鳥如生馬頭娘子已藏形幻作柱頭丁令月  
羽還須剪就縞衣不待裁成若教沖舉向青冥應化遊  
絲千仞

錄附

柘宜山石實曰佳佳鳥所食也木裏有紋可旋為器葉  
可飼蠶葉硬不如桑叢生榦踈而直葉團而有尖飼蠶

取絲作琴瑟絃爾雅謂棘繭即此蠶也謂之冷水絲實如棗子而圓其木染黃赤色謂之柘黃木可為弓與屨同名烏號弓張曲江第側古柘人目之白文章樹又有奴柘生江南山野有刺冬不凋亦可飼蠶

附錄

榆錢一名榆莢榆有數十種今人不能辨惟知莢榆白

榆刺榆榔榆數種榆一名零一名蘊莖白者名枌二月

生莢生青熟白形圓如小錢故名榆錢鄒子春取榆柳

之火酉陽雜俎盧縣東有金榆山榆莢化為金錢傳物

志啖榆則眠不能覺周庾子山信句云興雲榆莢雨唐

白樂天句云錢穿短貫榆又句云隔牆榆葉散青錢李

長吉賀句云榆莢相催不知數沈郎青錢夾城路曹堯  
賓唐句云欲將心就仙郎說借問榆花早晚秋僧清晝  
皎然寓興詩云天上生白榆白榆直上連天根高枝不  
知幾萬丈世人仰望徒攀援誰能上天採其子種向人  
間笑桃李因問老仙求種法老仙嗤我愚不荅始知此  
道終無成還如瞽夫學長生宋孔毅父平仲榆錢詩云  
鏤雪裁綃箇箇圓日斜風定穩如穿憑誰細與東君說  
買住青山費幾錢明吳匏庵寬詩云始我種三榆近在  
亭之左西日待隱蔽陰成客能坐七年長漸高密葉已  
交鎖生錢聞可食貧者當果蘇其一忽惟悴嚙腹緣蟻

螺持斧欲伐之材未中船舵藤蔓方附麗不伐亦自可  
古人無棄物守圃長用跛李氏玉英句云柴扉寂寞鎖  
殘春滿地榆錢不療貧近時汪茗文琬榆錢和麪蒸食  
詩云黍飯齋湯故有緣先生捫腹每悠然旋收榆莢成  
清供下箸何殊食萬錢徐嵇庵夜榆錢曲云家家採榆  
錢雜以菠菱炒高枝難盈筐徒自煩指爪糝米作羹并  
作團滑美初嘗倍鮮好由來造物本象形天地為爐亦  
已巧須知草木自生成不應專為饑人飽前日採榆錢  
榆錢日尚小今日採榆錢榆錢日已老榆錢日小日還  
多榆錢日老將奈何謝方山重輝詩云白榆三五株近

在吾廬右一遇春陽敷喜見錢生厚荒園愁窮僻取食  
資八口葉密知夏交陰踈惜秋後飄零感時節此理難  
能剖吾欲細斟酌慎勿厭白首家初白榆錢糝云天上  
星榆歷歷看春風吹綻小團團柔條摘處青成串新火  
烹來翠滿盤槐葉冷陶難比色藜羹舊糝記同餐他時  
詩向田翁說此味曾經賜大官王東田友亮食榆錢偶  
作云小甌吹香比舍傳登盤一一愛勻圓賦形恰擬春  
星碎著色還經夜雨鮮人盡飽來循舊俗火剛鑽後帶  
新烟自嘲儉腹從今富下箸公然費萬錢陳其年河傳

第九體

詞云蕩漾誰傍輕如蝶翅小於錢漾拋家離井若

為憐淒然江東落絮天年年苦被東君鑄啼鶻訴賤買  
韶光去漲晴湖剪春蕪模糊漫空下五銖



松花壽品也松百木之長猶公故从公三鍼者為栝子松俗名剔牙松七鍼者為果松千歲之松下有茯苓上有兔絲又有赤松白松鹿尾松孔雀松之別此外又有金松洛中有魚甲松廬山有麈尾松二三月抽蕤生花長四五寸采其花藥名松黃松節曰松骨葉曰松毛皮曰赤龍皮其津液精華入地名松脂一名松膏一名松香一名松膠一名松肪一名瀝青松脂千年化為茯苓一名茯苓靈一名伏兔一名松腴一名不死麵有大如拳如斗者外皮黑而細皴內堅白似鳥獸形者為佳有赤白二種抱木者為茯苓神茯苓千年化為琥珀一名江珠又

千年為璽狀如黑玉蜜蠟亦多年琥珀所化又茯苓千  
年其生小本狀如蓮花夜視有光燒之不焦服之長生  
帶之避兵名木威喜芝松三千歲者其皮中有聚脂狀  
如龍形名飛節芝松樹綠衣名艾蒟趙松雪琴亦名艾蒟松子有  
龍牙子玉角子原化書有松花酒居山雜識有松花餅  
曾封大夫亦號將軍法潛指為蒼顏叟洪潞呼為木貞  
夫丁固得兆曰十八公於潛人名為木長官唐姚秘書  
合採松花詩云擬服松花無處學嵩陽道士忽相教今  
朝試上高枝採不覺傾翻仙鶴巢韋蘓州應物紫閣東  
林居士叔緘賜松英丸詩云碧澗蒼松五粒稀侵雲來

去露霑衣夜啓羣仙合靈藥朝思俗侶寄將歸道場齋  
戒今初服人事葷羶已覺非一望嵐峰拜還使腰間銅  
印與心違宋曾吉甫幾松花云幽人所住空山裏老松  
皆作虬龍起但知樹底聽松風不見風前落松子三韓  
華萼手自開其間瑣碎如嬰孩請因賈客詔君長二十  
餘年無使來吳竹洲傲句云風急忽驚烏鵲起空階簌  
簌墮松花金張子發建擬古云客從岳頂來貽我松粉  
黃為言服之久身輕欲飛翔我嘗淡無味我嗅寂無香  
還君三太息世好方膏粱近時施愚山采松花詩云墜  
衣陟崇阜側聽寒泉流貞木發春華垂垂散林邱露滋

衰芳澤風急難久留掇英攀柔條笑與樵者謀薄可作  
糧糗兼令衰疾瘳留侯隨赤松果得長年不未知千載  
事今日歡良遊王漁洋謝人送松花詩云勞山千萬松  
六月失炎暑松膏化為醞松花落如雨色黃侔蒸粟味  
滑勝鍾乳會從嘯父遊白日生毛羽家初白詩云謾謾  
風吹墜粉乾似花仍不作花看滲成竺國瞿曇面染得  
華陽道士冠鶴翅勤來因掃拂蜂鬚難覓為高寒神方  
果有輕身訣劓取陰脂試共餐趙海客瀚收松花詩云  
寒姿不逐妍高士不為飾霜露飽天和華理無終匿吐  
花實衆葩漠漠擅一色陰森覆翼之蜂蚋莫相逼絀彼

黎粟功恥市飢渴德采采弗忍多重是高寒錫珍絨遺  
良朋寧使貧夫得梁范元龍雲寒松云修條拂層漢密  
葉障天潏凌風知勁節負雪見貞心唐宋延清題老松  
云歲晚東巖下周顧何悽惻日落西山陰衆草起寒色  
中有喬松樹使我長歎息百尺無寸枝一生自孤直杜  
少陵戲為雙松圖歌云天下幾人畫古松畢宏已老韋  
偃少絕筆長風起纖末滿堂動色嗟神妙兩株慘裂苔  
蘚皮屈鐵交錯迴高枝白摧朽骨龍虎死黑入太陰雷  
雨垂松根胡僧憇寂寞龐眉皓首無住著偏袒右肩露  
雙腳葉裏松子僧前落韋侯韋侯數相見我有一匹好

東絹重之不減錦繡段已令拂拭光凌亂請公放筆為  
直榦錢仲文起畫松云昔聞生澗底今見起豪端衆草  
此時沒何人知歲寒豈能裨棟宇且欲出門闌只在丹  
青筆凌雲也不難柳子厚宗元商山孤松云孤松停翠  
蓋託根臨廣路不以險自防遂為明所悞幸逢仁惠意  
重此藩籬護猶有半心存時將承雨露陸敬輿贄禁中  
春松云陰陰清禁裡蒼翠滿春松雨露恩偏近陽和色  
更濃高枝分曉日靈韻雜宵鐘嵐助爐烟遠形疑蓋影  
重願符千載壽不羨五株封倘得迴天眷全勝老碧峰  
施希聖肩吾觀吳偃畫松云君有絕藝終身寶方寸巧

心通萬造忽然寫出澗底松筆下看看一枝老白樂天  
松聲云月好好獨坐雙松在前軒西南微風來潛入枝  
葉間蕭寥發為聲半夜明月前寒山颯颯雨秋琴泠泠  
絃一聞滌炎暑再聽破昏煩竟夕遂不寐心體俱偷然  
南陌車馬動西鄰歌吹繁誰知茲簷下滿耳不為喧章  
正字孝標小松詩云爪葉鱗條龍不盤梳風幕翠一庭  
寒莫言只似人長短須作浮雲向上看又僧院小松云  
拋杉背柏冷僧簾鎖月梳風出殿簷還似天台新雨後  
小峰雲外碧尖尖李義山高松云高松出衆木伴我向  
天涯客散初晴後僧來不語時有風傳雅韻無雪試幽

姿上藥終相待他年訪伏龜又李肱所遺畫松詩云萬  
草已涼露開圖披古松青山徧滄海此樹生何峰孤根  
邈無倚直立撐鴻濛端如君子身挺如壯士曾樛枝勢  
夭矯忽欲蟠拏空又如鷲螭走默與奔雲逢孫枝擢細  
葉旖旎狐裘茸鄒顛蓍髮軟麗姬眉黛濃視久眩目睛  
倏忽變輝容竦削正稠直婀娜旋敷峯又如洞房冷翠  
被張穹籠亦若墮蘿女平旦妝頰容細疑襲氣毋猛若  
爭神功燕雀固寂寂霧露常衝衝香蘭媿傷暮碧竹慙  
空中可集呈瑞鳳堪藏行雨龍淮山桂偃蹇蜀郡桑重  
童枝條亮杪脆靈氣何由同昔聞咸陽帝近說嵇山儂



或著仙人號或以大夫封終南與清都烟雨遙相通安  
知夜夜意不起西南風美人昔清興重之猶月鐘寶笥  
十八丸香緹千萬重一旦鬼瞰室稠疊張纍量赤羽中  
要害是非皆匆匆生如碧海月死踐霜郊蓬平生握中  
玩散失隨奴僮我聞照妖鏡及與神劔鋒寓身會有地  
不為凡物蒙伊人秉茲圖顧盼擇所從而我何為者開  
懷捧靈蹤報以漆鳴琴懸之真珠櫳是時方暑夏座內  
若嚴冬憶昔謝四騎學仙玉陽東千株盡若此路入瓊  
瑤宮口詠元雲歌手把金芙蓉濃藹深霓袖色映琅玕  
中悲哉墮世網去之若遺弓形魄天壇上海日高瞳瞳

終騎紫鸞歸持寄扶桑翁李推官咸用小松歌云幽人  
不喜凡草生秋鋤劓得寒青青庭闕土瘦根脚猗風搖  
雨拂精神醒短影月斜不滿尺清聲細入鳴蛩翼天人  
戲翦蒼龍髯叅差簇在瑤階側金精水鬼欺不得長與  
東皇逞顏色勁節暫因君子移貞心不為麻中直杜彥  
之荀鶴小松云雖小天年別難將衆木同侵僧半牖月  
向客滿襟風枝拂行苔鶴聲分叫砌蟲如今未堪看須  
是雪霜中韓江州溉松云倚空高檻冷無塵往事閒徵  
夢欲分翠色本宜霜後見寒聲偏向月中聞啼猿想帶  
蒼山雨歸鶴應和紫府雲莫向東園覓桃李春光還是

不容君李正道中題新栽小松詩云  
屬開幽澗蘚苔斑  
移得孤根植砌前  
影小未遮官舍月  
翠濃猶帶舊山煙  
羣花解笑香寧久  
衆木雖高節不堅  
輸我婆娑欄檻內  
晚風蕭颯學幽泉  
陸允大希聲松嶺云  
嶺上青松手自栽  
已能蒼翠映莓苔  
歲寒本是君家事  
好送清風月下來  
羅昭諫隱小松云  
已有清陰逼座隅  
愛聲仙客官過無  
陵遷谷變須高節  
莫向人間作大夫  
僧景雲畫松云  
畫松一似真松樹  
且待尋思記得無  
曾在天台山上見  
石橋南畔第三株  
宋韓稚圭琦林畔  
松云鬱鬱山頭翠  
色攢就中高格  
出林端霜凌勁節  
難推抑石纏危根  
任

屈盤古鬣自隨仙日老孤風不入俗人看時來匠者須  
回顧且稟幽姿待歲寒蔡君謨襄松徑詩云青松冉冉  
門前道根底堅牢顏色好鳴籟蕭森風雨生紫鱗開動  
龍蛇老天若有意別留種百年其下無纖草雷霆時繞  
雪霜重勁節支持不顛倒野姿峭拔已背時肯要藤花  
彊纏抱南方赤夏苦蒸濕萬木無聲就僵槁忽經密蔭  
少休息肌骨便驚秋氣早寄言匠者勿復顧留作清涼  
除熱惱王半山前日石上松云前日石上松剝移沙水  
際青青折釵股俯映幽人砌蟠根今鬯茂落子還蒼翠  
三年一楮葉世事真期費又古松云森森直幹百餘尋

高入青冥不附林萬壑風生成夜響千山月照挂秋陰  
豈因糞壤栽培力自得乾坤造化心廊廟乏材應見取  
世無良匠勿相侵又松聲云天機自動豈關情能作人  
間物外聲瞑聒一堂無客夢曉悲千嶂有猿驚廟中奏  
瑟沈三嘆堂下吹簫失九成俚耳紛紛多鄭衛直須聞  
此始心清東坡戲作種松詩云我昔少年日種松滿東  
岡初移一寸陰瑣細如插秧二年黃茅下一一攢麥芒  
三年出蓬艾滿山散牛羊不見十年餘想作龍蛇長夜  
風波浪碎朝露珠璣香我欲食其膏已伐百本衆人事  
多乖迂神藥竟渺茫竭來齊安野夾路鬚髯蒼會開龜

蛇窟不惜斤斧瘡縱未得茯苓且當食流肪金盞百出  
入皎然散飛霜槁死三彭仇瀑換五穀腸青骨凝綠髓  
丹田發幽光白髮何足道要使雙瞳方却後五百年騎  
鶴歸故鄉又登州孫氏松堂云萬松誰種已擬擬半嶺  
蒼雲映此邦露重珠瓔蒙翠蓋風來石齒碎寒江浮空  
兩竹橫南閣倒景扶桑射北窻坐待夕烽傳海嶠重城  
歸去蹋逢逢又種松云露宿泥行草棘中十年春雨養  
顛龍如今尺五城南杜欲問東坡學種松君方掃雪收  
松子我已開榛為茯苓為問何如插楊柳明年飛絮作  
浮萍子由種松云城郭人家歲寒木檜柏森森映華屋

青松介僻不入城野性特嫌塵土辱中庭冉冉盈尺苗  
條榦雖短風霜足培根不用糞壤厚插竹預防雞犬觸  
他年期汝三丈高獨立仙翁毛髮綠老人自分不及見  
子孫見汝知遺直又題呂希道少卿松云溪回山石間  
蒼松立四五水深不可涉上有橫橋渡溪外無居人盤  
石平可住縱橫遠山出隱見雲日暮下有四老人對局  
不回顧石泉雜風松入耳如暴雨不聞世人喧自得山  
中趣何人昔相遇圖畫入紈素塵埃依古壁永日奉樽  
俎隱居畏人知好事竟相誤我來再三嘆空有飛鴻慕  
逝將從之遊不惜爛樵斧孔毅父平仲詠道上松云長

松高落落積雪白皚皚鱗鬣凍且僵鬱結久不開觀其  
纏壓意直使同枯荻雁帶寒光去鳥傳春信來微陽入  
直幹生意忽已回豁若醉初醒整頓出塵埃秀色媚山  
腹孤標摩斗魁時至自當復安得常摧頽若非根木壯  
何能異草萊徐仲車積大松歌云東海有物天下雄萬  
靈戮力生竒松天精地粹萃其下滄溟百道來相通一  
根直去穿九泉一根斜插鯨魚淵遠者壓折巨鼇背近  
者倒纏山根偏小枝可就千鈞弓大枝可挂萬斛鐘惟  
有老幹苦難狀呂光營外堆元龍身披北帝雄犀甲虎  
賁連臂圍不匝無計都將大地遮有心盡把浮雲刷膠



枝入地旋復上怪怪竒竒非一狀谷陵相變任古今土  
木兩行專王相列幟空遺渭川壘犒師留得楊隋帳元  
駒來撼亭亭蓋淥魚飛入蒼蒼浪最是半霄風雨聲山  
妖走盡川魅驚十萬爭揮鐵槊騎百千齋闕黑旗兵有  
時海面波濤小一部仙韶下蓬島殘聲逐水散鳴琴遺  
響穿雲聚啼鳥混沌死來凡幾朝清氣濁氣痕未消獨  
葉簞來新蓋鳳雙柯合處舊藏蛟其本既異其事殊德  
若有容材有餘大鵬斥鷃皆可居相忘有似江湖魚美  
哉此木真不凡能以智免斧斤間過盡工師無所用莊  
周應作不材者大松小松如此竒方輿圖蓋不可知陰

陽山海氣合離不然神物相護持郭功父祥正松風云  
夜寐松風度魂清客枕寒琴聲傳不禁詩句寫應難驟  
雨傾瑤砌真珠落玉盤隱居如可訪吾欲跨翔鸞陸放  
翁雙松云東岡夭矯兩蒼龍千尺蟠空黛色濃六十餘  
年松若此誰知我更老于松楊誠齋詩云翠旌綠纛夾  
車輪龍作長身鐵作鱗莫笑道傍數松樹古來老卻幾  
官人修途殘暑僕夫勞午憩茅簷尺許高忽有涼風颯  
然起小松呼舞大松號松本無聲風亦無適然相值兩  
相呼非金非石非絲竹萬頃雲濤殷五湖莫信秦人五  
大夫一生清苦不敷腴也將青玉琯釵子一一釵頭綴

兩株老人手種一川松為棟為梁似未中只合茅齋聽  
驅使為公六月喚清風夾道松杉半老蒼前賢餘澤未  
應忘君看直榦連雲起豈但當年蔽芾棠一生著數落  
人先自愛栽松自可憐待得茯苓堪採掘此翁久已作  
飛仙雷何思思食松子詩云千巖玉粒盡長松半夜珠  
璣落雪風休道東游無所得歲寒梁棟滿胸中金馮叔  
獻壁怪松云崧高地氣靈花木竟妍秀玉峯西南趾有  
松獨怪陋偃蹇如蟠螭奮迅如攫獸葉勁鬚髯張皮古  
鱗甲皺菌蠢藤瘦怒支離筇節瘦月上虬影搖風度雨  
聲驟子落慰枯禪枝樛礙飛鼬盤根萬乘器平蓋千歲

壽樵斤幸免尋厦匠矧官構龍化會有時天旱期汝救  
雷希顏淵怪松云物生自有常怪特物之病嗟嗟此老  
蒼怪怪生魁病侏儒盛髀股宿瘤擁腮頸蜿蜒蛟龍戲  
騰擲軀虎竟鬚髯喜張磔意氣怒狂迸匠石求棟楹節  
目足譏評鬬蕘急薪樵堅悍空盼瞪靜言觀倚伏未易  
相吊慶雖違時世用顧免斧斤橫陽秋莫榮悴歲月何  
究竟盤盤曲則全挺挺獨也正小草悞掃迹伏神還守  
性儻隨天中景廣宇共庥映王拙軒寂松風云蒼髯踈  
影冷浮煙坐久披襟更灑然蕭索半天吹急雨清涼三  
峽泛流泉尋真客至花飛下憩寂僧闕子滿前却笑朱

門無遠韻祇將俗耳醉繁絃元王元章冕題夏迪雙松  
圖云我昔曾上五老峰白雲盡處看青松中有兩樹如  
飛龍正與夏迪畫者同夏迪畫松得松趣箇箇乃是廊  
廟具貞固不特凌雪霜偃蹇猶能吐煙霧蒼髯獵獵如  
有聲鐵甲半掩苔花青六月七月炎火生對此似覺形  
神清丈人兀坐誠有道豈比商山采芝皓有琴有琴不  
須彈而今世上知音少又孤松歎云孤松倚雲青亭亭  
故老謂是蒼龍精古苔無花護鐵甲五月忽聽秋風聲  
幽人恐爾斧斤辱獨傍孤根結茅屋月明喜看清影搖  
雪凍却愁梢尾秃昨夜飛霜下南海山林草木無光彩

起來摩挲屋上松顏色如常心不改幽人盤桓重慨慷  
此物乃是真棟梁嗚呼既是真棟梁天子何不用是扶  
明堂馬伯庸祖常小松云買松栽兩階綠髮已可梳恐  
是女元君截鬚生地腴遲爾千尺長下產黃琥珀服以  
安心神飛身作仙客虞伯生集羅若川畫松云暮春多  
雨晝冥冥羅生畫松當素屏老蛟化為劍氣黑白鶴下  
啄苔痕青傳來日暮白篝火夢入幽巖尋茯苓不遇胡  
僧露雙脚石函自了讀殘經程雪樓鉅夫趙閑閑畫松  
和韻云辭華推哲匠才大古云難如許明堂具偏宜畫  
裏看傳汝礪若金題畫松云遙憶商頌松色青女蘿枝

上醉眠醒自從四皓安劉後歲莫何人采茯苓宋子虛  
无南岳李道士畫雙松圖云道士醉卧天柱峰睥睨石  
上千年之老松松精相感入夢寐化作蒼髯雙老龍酒  
腸空洞生鱗角飛出兩龍醉不覺湏臾霹靂撼五岳豐  
隆縮手不敢捉神靈頃刻歸虛無壁上但見雙松圖松  
耶龍耶莫能詰棟梁霖雨藏秃筆謝宗可龍形松詩云  
天矯挈雲海上來蜿蜒蜕骨老莓苔紫髯夜溼千山雨  
鐵甲春生萬壑雷影動欲翻平陸起聲號如捲怒潮回  
蜷枝冷挂巖前月猶似擎珠照九垓張伯雨天雨和斷  
江和尚種松云松下微吟愜病悰支離潦倒似支公頂

因巢鶴翻成結心為依禪畢竟空陸子壇前春古淡葛  
洪井上雨青葱茯苓乞與楊員外誰復絨詩過浙東楊  
廉夫維楨題萬松圖云紫芝道人天思精南來新畫青  
松障東家畫水西家山積棄成鱣忽如忘突然槎牙生  
肺肝元氣淋漓迫神王亟呼圓瓦倒墨汁盡寫髯官立  
成仗羣爭十丈百丈身氣敵千人萬人將交柯玉鎖混  
鱗甲屈鐵金繩殊骨相石鬪雷霆白日傾雨走蜩龍青  
天上前身要是僧擇仁五百蜿蜒見情狀天台老林亦  
畫松三株五株成冗長我家東越大松岡五鬣蒼蒼鬱  
相望門前兩箇赤婆娑上有元禽語相向雕龍梓客朝



取材伏虎將軍夜偷餉安得射洪好絹百尺強令涇陰  
森移疊嶂鼓以軒轅之瑟五十絃共寫江聲入悲壯明  
劉青田基題趙文敏公畫松云吳興昔王孫能畫世莫  
及觀其二松圖矯若龍出蟄蟠根破坤輿拔萃滙原隰  
膠加各軒翥削劣相倚立鬣鱗撐空青豕鬣振颯飄高  
藏日月氣清滴雲霧汁垂釣者何人短棹非妄集五湖  
多風濤蛟蜃頭角解不如洿澤間取足鱖與鰓倦眠松  
影下百竅清涼入慎勿驚松板天寒衣袂溼張來儀羽  
戴山石上聽松云溷耳俗誼久茲晨一清聽長松遮鮮  
颺哀壑互相應奔騰駭濤瀨窈渺韻笙磬至音不假器

始覺自然勝緣觸故成聲動極還歸靜此時憩石坐默  
然待其定乃知棄瓢者未悟聞中性陳白沙戲題張千  
戶畫松云張侯畫松人不識松不畫橫惟畫直上干青  
霄下盤石倒卷蒼龍二千尺神物安可留屋壁變化虛  
空了無迹不然恐遭雷斧劈左手執弓右持戟取勝無  
過萬人敵侯莫畫松費筆力程克勤敏政松月圖云綠  
釵搖影見分毫露下空庭月正高禮罷夜壇頻側耳一  
天涼籟洗秋濤李西涯題畫松云畫松不必真似松風  
骨略與畫馬同畢宏曹霸兩奇絕妙意止在阿堵中君  
家素壁光如雪上有蚪枝老垂鐵晚歲長同怪石寒炎

天恥受高雲熱江翻樹轉爭喧  
十步九戰何時開陰房半  
高山鬼嘯海水不斷天風來  
城南野人頗醇古坐愛涼  
秋滿虛宇安得移來十丈  
青高價如山棄如土知君  
此興迴莫攀謂予苦絆風  
塵間攜琴載鶴招使去我  
家自有徂徠山又為卜刑  
部題畫松云玄雲匝地黯  
無輝老榦盤空勢不歸疑  
是葉家堂上見夜深風雨  
墨龍飛十年不到山中路  
又見青松畫裏生擬著茅  
堂最深處石窗涼雨聽秋  
聲郎官對坐一松孤共識  
西臺兩大 夫十八年中  
今已半夜來曾夢作公無  
屠緯真隆羅漢松云何年  
蒼叟住禪林百尺婆娑萬  
壑陰四果總來成

佛印一官應不受秦侵靈根歲月跣跌久老榦風霜面  
壁深謾謾回飈響空谷猶聞清夜海潮音金子長幼攷  
題萬松圖云一別鄉園廿四春種來松樹已成村寄言  
孫子須培植剪伐無令及本根種得長松萬箇多連山  
數里暗煙蘿何時投老歸鄉曲分我寒巖翠一坡申瑤  
泉松岡云宛轉循高阜青葱結茂林團雲低蓋影挾雨  
送濤音節抱風霜苦根盤歲月深亦知宏景意山閣助  
清吟馮琢菴詩云齋前松樹不盈咫亭亭車蓋層雲似  
虬枝婉婉世所希嗟爾勁節乃如此豈無凌霄姿一旦  
成繞指雷雨方排未敢爭龍蛇將蟄何當起展轉空向

入詰曲誰相理直木從來忌先伐曲榦猶存愈於死問  
君曲直安可為大道委蛇誰則知請君看取歲寒色猶  
自青青似舊時董思白其昌題偃松圖云當年高隱傲  
千峰搜得峨眉偃蓋松出蟄蒼龍呈怪狀游空雲鶴見  
遺蹤居然玉局銘三植不向金泥羨五封顧我亦銜風  
木恨并刀一為剪吳淞陳眉公繼儒詩云羣松合抱支  
斲側十里濃陰半山黑村翁記松不記年依稀傳是支  
公植支公曾向松之下調鶴調鷹復調馬皮皴甲蛻化  
髯龍誰知復有屠龍者使君買松欲製亭煙姿雪榦仍  
青青一朝頓脫儻父厄要知樹老多精靈夜靜空林覺

人語大松小松共爾汝願以長生報使君結得茯苓如  
斗許又云老松作牆節作瓦道人來自天台者不煮黃  
精不劓苓張口如箕坐松下一片松濤勝古冰細咀飽  
嚼風稜稜吾將礪齒齒已折只恐松枯化為石孫達甫  
繼嘉吳生窟室畫松歌云吳生畫松真竒絕鐵榦龍鱗  
枝糾結風毛瑟瑟看欲動陰崖六月生霜雪孤根踞石  
蔭寒泉突然縮出徂徠山懸蘿挂壁若烟霧歲深積蘚  
古連錢疑是仙槎斗邊落傳聞頻下青田鶴閱聽笙簧  
滌世情驚濤忽起轉相愕吁嗟乎窟室松曷不亭亭直  
逼丈人峰胡為乎屈曲偃卧一洞中雲鎖洞門識松意

避秦不受大夫封請君莫為山松惜山深翻逃斧斤厄  
一任羣世竟芳歇貞心不改歲寒碧吁嗟乎窟室松下  
有斗大如雪茯苓生長鏡斲取千年質由來此物通仙  
靈飽服大藥松底卧醒來一嘯萬山青近時施愚山慈  
仁寺松云直欲凌風去翻從拂地看摧殘經百折偃仰  
鬱千盤老閱山河變陰兼日月寒支離爾何意不厭卧  
長安王洎來澤宏詩云去年手植新松樹碧葉青枝取  
次陰榦長凌雲應有日後人誰識歲寒心王西樵士祿  
松嘆云酷愛支離叟能令俗慮刊籍康忘檢束綺角偉  
衣冠秀發知黎廟蒼茫憶潞壇那堪交臂下失却百回

看王漁洋和窟室畫松歌云黃門園中有窟室背枕亞  
祿臨滄溟石壁磊砢一千丈入眼髣髴生精靈橫壁老  
松誰所作海風挈攫山欲傾盛陰五月凜霜雪怒姿萬  
變盤雷霆疑是溟渤含日氣不然天上来星精我来盛  
夏變冬序白晝慘淡生晦冥顛毛亂指舌上撝寒飢起  
粟心骨驚上下蒼茫有神鬼左右騰跳飛鼉鼉江南吳  
生昔為此一一下筆皆龍形畢宏韋偃去已久妙筆于  
今誰弟兄吳生作此良已苦徂徠銅鞮互變更昔者吳  
道子畫壁天宮寺將軍劒舞何蔚跂興酣筆落氣磅礴  
萬夫動色嗟神異吳生畫松已百載鐵榦霜皮終不改



南榮曝背亦吾儔，偃蹇龍鱗好相待。又松巢云仙人樓，  
居苦逼仄要與老鶴分。松風天風蓬蓬起，天籟寒濤萬  
頃生。虛空仙人曲肱睡，正熟馭風倏過扶桑東。下視蓬  
萊玩清淺，太華夜碧聞清鐘。又題畫松云：林燈明暗雨  
糝糊，雷電冥冥夜氣孤。破壁長松欲飛去，曉來疑是坐  
龍圖。張超然遠松濤句云：月明何處雨風定，數聲鐘宋  
牧。仲題倪高士幽澗寒松圖云：松色與澗幽，依稀寒溪  
路。珍圖傳江南，三日留閉戶。雲煙拂几席，流覽慰遲暮。  
寥寥此筆墨，深合荆關度。俗韻吾庶免，永言高士晤。王  
雲岡時鴻巖上小松云：纔經霜雪幾春秋，點染青山分

外幽却笑丈人峰下樹千年封爵為秦留顏遜甫光敏  
詩云自抵東峯上鼇背滑石登頓腳不停崩崖劃開怪  
蛇鬪晴空幻作游塵形魂搖目悸行障面耳邊忽覺聞  
清泠東峰拔地五千仞明星玉女愁雲駟疾風四起颺  
屋瓦獨留大樹排天庭孤高自絕雨露上鴻濛一起含  
精靈嶺猿長嘯雜竽籟山魃欲入愁雷霆影落千山勢  
天矯西連月窟東滄溟名山福地闕略盡蝼蟻神穴無  
人經洞口歲甦瑣雙樹霜中著葉疑冬青此松摩挲幾  
千載十尋之上常冥冥翠旌孔蓋紛相盪蒼鱗夜夜蛟  
龍腥松根羽人皆皓首遠尋五粒斲茯苓卻問秦松近

無恙仰天大笑誰能聽謝方山詩云吾年五十七栽松  
欲何用不惜劬與勞閉門資幽供為愛冬猶青且可成  
樑棟熠熠翠莖翻團團清露重風來寫遺聲猶勝聽鳥  
哢趙宣四于蕃松風云我有百尺松蔭簷枝相亞好風  
巢其間清濤永仲夏如造宏景庭如入元禮舍如聆鍾  
期音如馭列子駕一聞炎暑退再聽涼秋瀉僕從長安  
來我正眠松下詩人王司農遺書何蘊藉趙州和尚語  
思之猶啖蔗倚松見茲言披襟欣舉尊曹升庵貞吉卧  
龍松云黃山有松皆不俗一枝兩枝等朱珊輪輪困困  
各異態不沾寸土精神完我來九月劇蕭撼震盪勇氣

凌高寒紅葉滿山飽秋雨諸松俱在青雲端鼓衰力竭  
不得上忽驚神物當空蟠澗壑陰森足冰雪此松偃蹇  
無凋殘朱鱗火鬣具頭角土花繡澀莓苔斑出為霖雨  
亦何有千秋濃睡風雷慳鼎湖騎汝去不返爭乃復卧  
青冥間我踞松上歌一闕天門積翠常漫漫董養齋思  
凝詠慈仁寺松云矯矯蒼龍姿鬱鬱青雲蓋俛仰何欽  
崎連蜷多古態突兀梵宮傍蕭疎清影碎雲雷棲其顛  
霜飈澄澆籟神物有真意紛榮非所愛豈同凡卉姿春  
華變明晦安得移空山日夕幽人對鄭季雅錢掇龍松  
歌云昔聞散花塢中片石峰破石孕出千丈之竒松今

觀非松又非石但見虬枝夭矯向空立得非竇子明汶  
陽放釣來一迎又疑軒轅帝板鬣飛騰在雲際上有鐵  
幹五鬣長絕似爪角森森張下有溜雨霜皮在鱗甲斑  
斑色五彩我欲繫之雙赤緇雲霧晦冥恐遁逃凜冽千  
年遺積雪慘淡六月聞寒濤吁嗟乎秦封大夫寧勝此  
胡為偃蹇空山裏一朝絕壑雷雨起看爾東行入海水  
尹望山繼善題畫松云自古稱知己天涯若比鄰何處  
繫相思煙雨樓邊人寄我畫高松灑墨老逾新霜皮含  
翠色虬幹尤精神數行斜點筆婀娜復停勻披圖識遠  
意百歲同青春畢秋帆松徑云曲徑彎環石級高滿亭

山色綠周遭松風似厭泉聲小自寫雲門百尺濤杭堇  
浦世駿畫松云汝有歲寒心人苦不知耳日持作談柄  
便已稱名士萬拓坡光泰科松云松羔四五尺繞節張  
鬚鬚一年一蒼蓋若萼承重跗低枝不成蔭錯還生意  
蕪海鶴夢來久何由閣輕軀雨餘試經理枉退直必扶  
支離既有象培塿何愁無踈釵落階砌濕翠飄樽壺陰  
陰長夏近早擬涼風俱朱景韓琦塞上雙松云光祿塞  
傍多古松蒼皮黛色無春冬聞有兩株更竒古深山巨  
壑埋幽踪按剔壯觀豈憚遠暇撥煙藹支扶筇瑟瑟數  
里外已似聞笙鏞崖傾路轉人跡絕始覩三重偃蓋摩

蒼穹是時秋高天宇空夕陽紫翠開龍從磊砂離立各  
千丈交柯接葉爭豪雄流雲穿脇度未盡疑是翠蚪爪  
鬣隱現孤光中積陰沉沉十餘畝吹香下覆仙靈宮停  
策却顧安敢逼神搖目眩心慌恍我聞瓦官寺六朝殘  
株冰雪容又聞青嶽陽五粒灰却餘秦封地近每為人  
護惜品題聲價光熊熊吁嗟乎爾獨胡為在僻遠有如  
志士棲蒿蓬綺皓落落與世隔漢庭誰識翊贊功安得  
少陵一老翁浩歌為爾開鴻濛使我空山獨立久太息  
驚沙萬里來長風李萑畹文蒸全州官松歌云三里盤  
石山五里飛鸞橋萬松導我入桂路百里不斷風蕭蕭

天方陞筆  
卷二  
歷磴沿溪入煙霧挈空蟠地皆龍蛟繁葉千層奮怒鬣  
直幹兩道驅奔濤鱗甲疊成絳雪色葛蘿纏附青桐條  
晴晝遮斷金烏影寒風吹落仙禽毛隙處看山盡石筍  
濃於染黛相競高我行二日惟叫絕徒御似亦忘其勞  
具說初栽自洪武太守章復龔黃曹樵蘇無敢肆斤斧  
一株枯死猶干霄清陰經今四百載不剪不伐長不凋  
始知為政貴遺愛莫以棲寄同鷓鴣作牧豈少營私橐  
有懷不為民憂焦身後宰木摧且盡行人誰續甘棠謠  
馬朗山松子詩云似塔還如紫荔枝教誰剝取子離離  
藏將老榦青蒼裡落在長濤澎湃時不分梧桐偏啄鳳



生憎榛栗早陳詩仙人棋罷渾無事餐向煙霞勝採芝  
曾賓谷煥岳忠武手植松云大厦將憑一木支種松心  
事不勝悲唐宮曾有重榮樹夏社寧無再造期塞外龍  
鱗摧朔雪湖邊馬鬣傍南枝故都花石誰收取辛苦荆  
襄制置時宋陳同甫亮臨江仙詞云五百年前非一日  
可堪只到今年雲龍欲化豔陽天從來耆舊傳不博地  
行仙昨夜風聲何處度典型猶在南山自憐不結傍時  
緣著鞭非我事避路只渠賢又水龍吟詞云錢王霸業  
成時多應是百年遺樹羞將高古為渠遮映魚鹽調度  
且向空山趁時多事四垂盤踞算興衰坐閱權竒磊塊

世間斤斧又見當天明聖便彈丸也難分土一番整頓  
舊家草木新來雨露鐵石心腸虯龍根榦亭亭天柱縱  
茯苓下結蔦蘿高際怎堪攀附宋張功甫鉷松根枕云  
鬱鬱凌寒色來宜此地蟠解衣輕盾日假蓋得秦官香  
宿風微墮青留雨未乾通宵巖側夢根竅手藏丹近時  
王阮亭古松根枕云千年古澗松琥珀化為枕平生陶  
隱居夢與松風近細雨夢初回蒼鼠來窺侵唐杜工部  
茯苓詩戲呈楊員外云寄語楊員外山寒少茯苓歸來  
稍暄暖當為斲青冥翻動神仙窟封題鳥獸形兼將老  
藤杖扶汝醉初醒吳子華融病中宜茯苓寄李諫議云

千年伏菟帶龍鱗太華峰頭得最珍金鼎曉煎雲藻粉  
玉甌寒貯露含津南宮已借徵詩客內署今還託諫臣  
飛檄愈風知妙手也須分藥救漳濱宋梅聖俞堯臣人  
形茯苓云因歸話茯苓久著桐君籍成形得人物具體  
存標格神岳畜粹和寒松化膏液外凝石稜紫內蘊瓊  
腴白千載忽旦暮一朝成琥珀既瑩毫芒分不與蚊蚋  
隔拾芥曾未難為器期增飾至珍行處稀美價定多益  
張功甫謝李仁父茯苓云岷峨山中千歲松枝虬幹直  
摩青空雪霜剝落中不稿膏液下與靈泉通龜跼鳧伏  
自磊砢金堅玉潔仍豐融篝明夜取喜得雋煮鼎朝聽

如吟風杵成坐上香飛雪更和乳酪收全功當知至味  
本無味予若服之壽無窮巽巖脊梁硬如鐵冠峨切雲  
佩明月百好都隨春夢空大藥獨傳鴻寶訣中宵咀嚼  
不搖頭玉池生肥噉不徹憐我百慮形蚤衰衰贈扶持  
意何切丹砂著根謾爾傳脂澤釀黍計已拙由来妙道  
初不煩此法莫從兒輩說徑思舉袂揖浮邱下視塵世  
真一呷朱顏留得亦何為追逐同堅歲寒節黃山谷茨  
苓鷓鴣天詞云湯泛水甕一坐春長松林下得靈根吉  
祥老子親拈出箇箇教成百歲人燈焰焰酒醺醺壑源  
曾未破醒魂與君更把長生盃畧為清歌駐白雲

附錄水松葉如檜而細長出南海

附錄落葉松塞外興安嶺多有之五臺亦有其皮可以當茶  
家初白有詠落葉松詩云千盤百折上興安寒燠平分  
咫尺間忽見萬松齊落葉人言山後是陰山

附錄杆松一名白松生塞外汗帖木兒嶺五臺亦有其榦直  
上其體最輕

附錄柏一名榭廣雅云汁柏樹聳直皮薄肌膩三月開細瑣  
花結實成球九月熟狀如小鈴柏陰木也向陰指西木  
之有貞德者故从白華山生文柏一名黃腸廣志有續  
柏成都有綺柏藍田有龍柏練溪有合掌柏大谷有倒

生之柏春秋運斗樞玉衡星精散為柏漢武亦封為大  
將軍唐岑嘉州參新栽柏樹詩云愛爾青青色移根此  
地來不曾臺上種留向磧中栽脆葉欺門柳狂花筴院  
梅不須愁歲晚霜露豈能摧杜少陵古柏行云孔明廟  
前有老柏柯如青銅根如石霜皮溜雨四十圍黛色參  
天二千尺君臣已與時際會樹木猶為人愛惜雲來氣  
接巫峽長月出寒通雪山白憶昨路繞錦亭東先主武  
侯同闕宮崔嵬枝榦郊原古窈窕丹青戶牖空落落盤  
踞雖得地冥冥孤高多烈風扶持自是神明力正直原  
因造化工大廈如傾要梁棟萬牛回首邱山重不露文

章世已驚未辭翦伐誰能送苦心豈免容螻蟻香葉終  
經宿鸞鳳志士幽人莫怨嗟古來材大難為用李義山  
武侯廟古柏云蜀相階前柏龍蛇捧閱宮陰成外江畔  
老向惠陵東大樹思馮異甘棠憶召公葉凋湘燕雨枝  
折海鵬風玉壘經綸遠金刀歷數終誰將出師表一為  
問昭融溫飛卿庭筠晉朝柏樹云晉朝名輩此離羣想  
對濃陰去住分題處尚尋王內使晝時應是顧將軍長  
廊夜靜聲疑雨古殿秋深影勝雲一下南臺到人世曉  
泉清籟更難聞段柯古成式穗柏聯句云一院暑難侵  
莓苔共影深枝標爭息鳥餘吹正開襟宿雨香添色殘

陽石在陰乘閒動詩意助靜入禪心宋司馬文正公光  
柏軒詩云凜然凌霜色本自生邱壑徒之君子庭栽培  
固不薄靜夜聲颼颼清晝陰漠漠秀氣逼簷楹翠影通  
簾箔知君梁棟材大匠偶未度但守歲寒心閑軒亦不  
惡王半山景福殿前柏云香葉由来耐歲寒幾經真賞  
駐鳴鸞根通御水龍應螯枝觸宮雲鶴更盤怪石誤蒙  
三品號老松先得大夫官知君勁節無榮慕寵辱紛紛  
一等看蘓子瞻園中草木云種柏待其成柏成人已老  
不如種叢筍春種秋可倒陰陽不擇物美惡隨意造柏  
生何苦艱似亦費天巧天工巧有幾官盡為汝耗君看



藜與藿生意常草草又御史臺柏云故園多珍木翠柏  
如蒲葦幽囚無與樂百日看不已時來拾流肪未忍踐  
落子當年誰所種少長與我齒仰視蒼蒼榦所閱固多  
矣應見李將軍膽落溫御史子由天封觀將軍柏云肅  
肅避暑宮石殿秋日冷凜然中庭柏氣歷千夫慙風聲  
咎萬壑雲色通諸嶺材大難為工甘與蓬蒿屏朱茂先  
長文多榦柏云古柏列重門連枝若弟昆叅天分直榦  
得地共靈根月照龍蛇影風吹鐵石痕鸞凰期可宿香  
葉向春繁金完顏仲寶璫黃華畫古柏云黃華老人畫  
古柏鐵簡將軍挽大弨意足不求顏色似荔支風味配

江瑤趙周臣秉文題巨然泉巖老柏圖云雪巖森危有  
老柏幾度寒泉漱秋月氣凌層空白日寒根貫斷崖蒼  
石裂奔騰逝水送流光剝落古苔封老節明堂未作棟  
樑材潦倒風霜半無葉何人曾次富泉石巨然袖中董  
元筆崖傾岸絕無人見夜半移舟真有力賢侯筆力今  
曹植氣象參天二千尺為迴筆力挽萬牛頓覺煙嵐少  
顏色元程雪樓鉅夫禹柏圖云我昔觀風江漢域大別  
寺中觀古柏皮空骨立二十尺扣之鏗然若金石雙龍  
盤擎爪角怒白晝歛恐風雷黑小枝旁出勢蜿蜒復似  
游龍顧深澤蒼蒼數葉森北向貞心不受螻蟻蝕我時

見此獨驚怪僧言相傳禹所植別來夢寐常髣髴恨不  
圖之堂上壁安南國王住漢陽府中好事黎侯崩皇慶  
元年同入覲忽持墨本來相覓開緘蕭蕭朔風起半幅  
生綃萬鈞力恰如大禹疏鑿時天斧雷破鬼神役自言  
得之寺僧手寺僧得之故侯宅舊本模糊鎖暗塵上有  
東坡手題墨臨摹欲遣天下知國王命我來索詩此柏  
會有摧朽日此卷豈有消磨時我聞此語坐太息神禹  
至今幾興衰人間老樹亦無數此樹應以人而竒門前  
馬鳴君欲歸黃河東去浮雲西歸語山僧謹護持莫令  
此柏凌空飛吳山樵萊觀禹柏圖云大別名山之伏鼇

大別古柏如立猱舊聞夏后手所植直軋南國無蓬蒿  
洪水曾當洛洞極聖躬乃此胼胝勞乘舟荆衡地可盡  
作貢雲夢天爭高一時栽櫛託所歷千載摩撫緊其遭  
本根盤挈屹巖巖枝葉挺拔森旌旄礙日吟風聳楚阻  
欺霜傲雪塵秦饗夜行夏首影弄月曉艤鄂滋聲吹濤  
信哉冥靈欲等壽材比楨幹終稱豪屏除緇翳虎豹泣  
鎮斷夔魍蛟龍逃匠石徘徊却喪斧篙工睥睨寧維舫  
吾知嘉木辨爾雅但惜芳草遺離騷平生環轍苦未到  
幸此畫筆何從操豈非神明護正直使在方漢雄城壕  
樓桑出牆尚久特巨櫟蔽社猶堅牢惟茲所重有聖德

坐見餘物真秋毫  
自來劉李富宮室  
命下荆蜀刮土毛  
一榮一枯驗世道  
勿翦勿伐臨江皋  
穆滿蒼茫黃竹詠  
重華慘澹蒼梧號  
逖然萬古萬萬古  
西望嘆息同露袍  
陳夢鹿樵雙柏圖  
云亭亭山上柏  
柯榦如青銅  
蒼古拔俗姿  
宵作兒女容  
風霜日搖落  
萬木為之空  
爾獨不見摧屹立  
如老翁乃知歸根妙  
生意恆內融  
願乘雷雨興化作雙飛龍  
明方希直孝孺栽柏云  
迂拙乖世用每蘊無窮思  
取效非目前遠與千載期  
翠柏信良材成長計功遲  
茲晨斲烟雨移種盈尺姿  
清廟巖潔地聖靈會於斯  
豈無杞柳輩不足當階墀  
殷社夙所尚古制非人為

先師實殷人植此理固宜但恐枝幹弱不耐風霜欺培  
護苟無失終見盛大時三年過人長十年齊桷榱百年  
必合抱根深柯葉滋青霄泊鸞鳳厚土蟠蛟螭豈特傲  
寒暑將堪閱興衰所托况得所永免斤斧危既膺顧盼  
榮復與翦伐辭寥寥百世後神物相扶持何必為棟梁  
乃見才氣施流光若飛翰時代易推移行看好古士追  
說種者誰我生素多病中歲早孱羸待為鶴髮翁見女  
凌雲枝志士用心者濩落為世嗤何如羣兒巧插槿紛  
成籬李蒼存奎古柏行云虞山古柏幾千歲根盤節錯  
羅星文靈氣常懸白日雨疎枝亂灑青天雲霜柯露榦

了不識半是蒼苔半成石石上猶存古鏡光青萍未拭  
芙蓉色我來八月秋氣濃月明滿地盤虬龍赤脚大叫  
不忍去長風吹落虞山鐘天生異物詎可測呵護常聞  
鬼神泣巖壑寧教無此材歲寒然後知松柏吳匏庵追  
和朱樂園多榦柏云新甫傳遺種吳門見後昆碧霄多  
直榦黃壤本同根霜雪持高節莓苔接古痕三年非檻  
木十畝自陰繁近時家初白古柏云不知移植是何峰  
拔地今成天矯龍左紐紋應儕老檜後凋名許配高松  
霸柯蔭合烏成瑞香葉年深鹿絕蹤獨貫四時無改易  
自天雨露正濛濛蒼髯翠甲映于思不染人間半點埃

自倚孤根堅鐵石對抽雙榦出樓臺陶家門外新栽柳  
王氏庭前手植槐何似先生扶正直階庭成就柏梁材  
趙秋谷西岡柏林詩云柏性本貞直獨立絕依傍何因  
植作叢不得表孤尚緣岡若荆榛櫛比失條暢兒童溷  
其下鳥雀喧其上衆正相壅遏遂令氣沮喪山翁持斧  
斤荒穢親滌盪一一千丈姿竟與雲烟抗林陰忽淡泊  
野望轉踈曠雨濯青銅柯風裊蒼虬狀勿抱棟梁羞廟  
堂正宏壯馮欽南歷詩云叢叢小柏儼千章翠影扶踈  
日月長種近仙山樓閣地好凝珠露待鸞凰金子青纓  
絡柏云古柏如古人槎枒屹相向來傳纓絡名或是娑



羅相莫作橫卧身朝來驚大匠

鋤竹柏生峩眉山葉繁長而籜似竹幹類柏而亭直宋景文有竹柏贊云葉與竹類緻理如柏以狀得名亭亭修直

鋤檜柏葉松身葉尖硬亦謂之栝今人名圓栝以別側栝唐劉夢得禹錫雙檜詩云雙檜蒼然古貌竒含煙吐霧鬱叅差晚依禪客當金殿初對將軍映畫旗龍象界中成寶蓋鴛鴦瓦上出高枝長明燈是前朝燭曾照青青年少時秦仲明韜玉詩云翠雲交榦瘦輪囷嘯雨吟風幾百春深蓋屈蟠青塵尾老皮張展黑龍鱗唯堆寒色

資琴興不放秋聲染俗塵歲月如波事如夢竟留蒼翠  
待何人皮襲美矮檜云撲地枚徊是翠鈿碧絲籠細不  
成煙應如天竺難陀寺一對狻猊相枕眠吳子華融三  
峰府內矮檜云擢秀依黃閣移根自碧岑周圍雖合抱  
直上豈盈尋遠砌行窺頂當庭坐比陰短堪驚衆木高  
已讓他林日轉無長影風迴有細音不容蘿葛樹只耐  
雪霜侵玉帳籠應匝牙旗倚更禁葉低宜拂席枝覆易  
抽簪綠澗支離久朱門拚映深何湏一千丈方有歲寒  
心宋胡武平宿慶雲寺檜云寶坊金布地嘉木此含榮  
吳帝留青蓋湘神駐翠旌月移香砌冷風入夜琴清若

比東陽樹婆娑意未平韓魏公小檜詩云小檜新移近  
曲欄養成隆棟亦非難當軒不是憐蒼翠只要人知耐  
歲寒梅聖俞堯臣檜詠云文章老重欲追古便作帝宮  
蒼檜詩青葱玉樹傳揚子盤屈洪桃見左思龍鱗已愛  
松身直珠寶還看柏葉垂秀木豔叢那可擬但將霜雪  
定堅姿東坡古檜云當年雙檜是雙童柏樹無言老更  
恭庭雪到腰埋不死如今化作兩蒼龍又和趙景貺栽  
檜云汝陰多老檜處處屯蒼雲地連丹砂井物化青牛  
君時有再生枝還作左紐文王孫有古意書室延清芬  
應憐四孺子不墮凡木羣體備松柏姿氣含芝朮薰初

扶鶴立骨末出龍纏筋巢根白蟻亂網葉秋蟲紛乃知  
蔽芾初甚要封植勤他年皮三寸狐鼠了不聞穎濱任  
氏閱世堂前大檜云君家大檜長百尺根如車輪身弦  
直壯夫連臂不能抱孤鶴高飛直上立狂風動地舞枝  
榦大雪翻空洗頰色人言此檜三百年未知昔是何人  
植君家大夫老不遇一生使氣未嘗屈沒身不說歸故  
里遺受自知懷舊邑此翁此檜兩相似相與閱世何終  
極汝南山淺無良材櫟柱棟椽聊障日便令殺身起大  
厦亦恐衆材無匹敵且留枝葉撓雲霓猶得世人長太  
息郭功甫祥正合肥何公檜云合肥有老檜得名自何

公何公何代人名述了莫窮高枝偃羽蓋低枝卧蒼龍  
盤根徹厚地踈影落寒空荏苒九天碧仍為煙霧濛相  
傳魏武帝解甲休鐵驄嘗坐此檜下吞吳未成功至今  
晦暝夕往往揚英風我公心好古清標聳千峰鑒賞揮  
巨筆丹青孰為工璨璨發明玉瑋瑋叩絲桐笑談走兵  
役垣牆密泥封拂拭枯折榦一助春風融願回拔山力  
移植明光宮陳后山師道植檜云種木待成林聊為千  
年事目中趨百里寧同萬牛費植檜三尺強已有凌雲  
氣生世能幾何擬作千年計衆人笑拍手君子用其意  
蕭蕭孤竹君忘言默相契名以金石交椿楊皆奴婢緬

懷萬仞巔千丈蔚蒼翠盤根泉石底用意霜雪外寧須  
大厦材坐待斧斤至散為風雨聲密作馬牛蔽朱樂園  
長文並秀檜云盤根幾百齡合榦倚冥冥偃蹇雙虬聳  
聯翩兩蓋青紫鱗霜外躍紺葉雨餘馨左紐憑仙宇何  
如拱泮亭王中甫令八檜圖云客有要我八檜吟手攜  
八檜圖來懸挂張滿壁揚可駭眄顧左右同嗟嘆旁摹  
石刻署名狀各有憑附相蚺緣或高相扶互倚礎或斷  
欲蹙猶支顛強枝拗回信有力高榦復俯蛟蚪拳尋根  
及株逮條蘖例不拔直皆旁偏雷疲風休雲雨去蛇龍  
鬪死猶鈎纏安分爪角與尾鬣徒見上下相蜿蜒不知

生時竟何謂略不參類常木然宜乎今古惑昧者搖擺  
舌吻歸之仙一尤盤拳老高大傳云聃老由飛躩當時  
駕鹿躡以上跡有町疇遺相連多應蝎殘鳥喙啄不爾  
誕者強鑿鑄聃能惑人已自幸豈此上去能欺天借如  
聃功可升躍鹿亦何幸飛相聯於中一本特甚異膚革  
逆理紐左旋傳云聃手所自樹我知此語定鑿穿苟令  
實為聃老植推以天意猶可言當年曷不紐以右若曰  
世為左道牽如何衆輒不省究反重神怪令聃專乾坤  
中含萬品彙此獨自異誰舍旃窮思竟慮莫可索欲世  
不惑誰能塞仙書虛荒喜誕妄推說事理尤綿延世人

一讀即化變日望飛奮相迷癩豈非此木久樹此浸漬  
亦為異說遷故其形植與生死時以異怪招驚憐先時  
世不蚤斤斧放其老大訛誇傳當年同生好材幹半以  
直伐成燒燃憑妖附誕相樹立卒自死活終完全葉枝  
凋疎不有蔭材直弗枉曲莫轅不知留存護養者竟以  
何理惜不捐我有尺鐵大剛利久已鑄斧磨山巔卒無  
柯柄尚棄置嬾乞月桂求婢娟林霽山景熙雙檜堂為  
魯聖可行可賦云魚頭公子冰雪姿根抵忠信華文辭  
乃翁手植豈無意貞固已作層霄期氣含芝木體松柏  
容成山下神仙宅清陰冉冉生庭除綠霧纖纖護琴冊



風簷對語如索詩君家伯仲諧損筮養成材器豐且碩  
蓄洩雲雨蟠蛟螭黃州謫臣坐詩累杳杳蟄龍空九地  
蒼根留取千載芳何物醜秦盜名字金元遺山好問濟  
南廟中古檜云亭亭祠宮檜鬱鬱上雲雨扶持幾來年  
造物心獨苦青餘玉川潤根入鐵岸古雖含棟梁姿斤  
斧安得取沈湫地中久駭浪思一鼓天柱屹不移水國  
奠平土乾坤此神物甲乙存世譜瀨鄉留耳孫闕里傳  
鼻祖秦松徒自汙蜀柏聊共數會待十抱成茲焉重摩  
拊元虞伯生古檜云根到深泉石作身踈踈香葉不知  
春海波不動天風遠千歲寒蛟作老人又畫檜云茅山

多古樹此檜更長生  
鶴鶴棲來穩蛟龍化得成  
雲深還近戶月落似聞笙  
千載如相見蒼然故舊情  
成盧江廷珪陳朝檜云  
千年老檜上青霄三閣花飛不動搖香骨  
自來盤左紐苦心未忍棄前朝蛟龍並立江雲黑鸞鳳  
雙啼海霧消想得龜蒙題詠處殿頭風雨正蕭條  
明吳原博孔林手植檜云魯宮久已壞孔宅仍如新  
悠悠二千載手澤嗟猶存  
所存匪他物竒樹當高門  
矯矯歷霜雪青青出埃塵  
親承時雨化生意常欣欣  
相傳藉文字烈火經嬴秦  
而此特萌蘖挺然異其羣  
羣木繞庭際合抱高入雲  
尋常豈得似隱起成旋文  
端如人索綯微纒

依然分米芾好竒士于道未必聞玩物有述作意與石  
丈均我來重謁拜欲去步幾巡維魯多松柏斷度見詩  
人徂徠與新甫遙瞻失嶙峋沈石田七星檜云海虞七  
星檜宜為羣木冠列生老子宮與邑作竒觀廣墀氣蕭  
森入門凜欲汗久信天地成沃知雨露灌傳植後蕭梁  
其說我恐漫驗斗形叵全七既斃其半三株實聊存難  
執歲月算各各具其異形容匪詞翰西體裂多槁豁然  
敞三判東體活亦裂筋骸互續斷北者蜷而禿袖破舞  
脫腕葉亦不暇葉榦亦不暇榦左文皮索絢孤絕頂留  
繖槎折象齒蹺癭決鬼目爛踈越復叢穴骸骭仍軒岸

蛟孽及猊跛努力不得竄牙長及劍短接戰驚楚漢如  
此紛怪駭眴君不能按知遭幾雷厄還屢兵火難生死  
付冥然造化反被玩君子重貞固頑醜小人譎緣高坐  
吹簫我欲呼鶴鶴從根覓埋丹澆泉覬紅燦長生就其  
蔭永作婆娑伴董思白咏孟檜云愛此孟家檜森然見  
典型沃根洙泗潤含氣嶧山靈閱世消秦篆叅天鬱魯  
青方知樗散壽只入列仙經近時錢香樹手植檜云古  
根生意豈用晦葆其天物以美斯愛薪緣寂更傳履聲  
猶宛在手澤此存焉會見新條發寧教衆草纏金絲長  
閔響鳧嶧遠含煙緬想濃陰下生徒立幾千杭大宗法

雲寺雙檜用溫飛卿韻云春陰接日萃鷗羣入寺尋僧  
靜趣分草色不殊驃騎宅風聲猶張皖城軍空枝野燒  
歸塵劫落日殘鐘殿梵雲公等共深懷古意香林清唄  
幾回聞

鰒  
檜松葉柏身千仞無枝葉與身皆直檜檜樹皆高丈餘  
花葉皆同但實稍大而色黃綠肉虛為異尸子松柏之  
鼠不知堂密之有美檜